

唐書

四十三



南蠻列傳第一百四十七上

西唐書二百二十二上

南詔或曰鶴拓曰龍尾曰苴咩曰陽劍本哀牢夷後烏蠻別種也
夷語王爲詔其先深帥有六自號六詔曰蒙嶺詔越析詔浪穹詔
遼賧詔施浪詔蒙舍詔兵埒不能相若蜀諸葛亮討定之蒙舍詔
在諸部南故稱南詔居永昌姚州之間鐵橋之南東距爨東南屬
交趾西摩伽陀西北與吐蕃接南女王西南驃北抵益州東北際
黔巫王都羊苴咩城別都曰善闡府王坐東嚮其臣有所陳以狀
言而不稱臣王自稱曰元猶朕也謂其下曰昶猶卿爾也官曰坦
綽曰布燮曰久贊謂之清平官所以決國事輕重猶唐宰相也曰
酋望曰正酋望曰員外酋望曰大軍將曰員外猶試官也慕爽王
兵琮爽王戶籍慈爽王禮罰爽王刑勸爽王官人厥爽王工館萬
爽王財用引爽王客禾爽王商賈皆清平官酋望大軍將兼之爽

猶言省也督爽總三省也乞託主馬祿託主牛巨託主倉廩亦清
平官酋望大軍將兼之曰爽酋曰彌勤曰勤齊掌賦稅曰兵孺司
掌機密大府主將曰演習副曰演覽中府主將曰繕裔副曰繕覽
下府主將曰澹酋副曰澹覽小府主將曰幕撫副曰幕覽府有陀
酋若管記有陀西若判官大抵如此凡調發下文書聚邑必占其
期百家有總佐一千家有治人官一萬家有都督一凡田五畝曰
雙上官授田四十雙上戶三十雙以是而差壯者皆為戰卒有馬
為騎軍人歲給韋衫袴以邑落遠近分四軍以旗幟別四方面一
將統千人四軍置一將凡敵入境以所入面將禦之王親兵曰朱
弩佉直佉直韋帶也擇鄉兵為四軍羅直子戴朱鞬鞬負犀革銅
盾而跣走險如飛百人置羅直子統一人望直蠻者在蘭蒼江西
男女勇捷不鞍而騎善用矛劍短甲蔽胸腹鞬鞬皆插貓牛尾馳

突若神凡兵出以望直子前驅以清平子弟為羽儀王左右有羽
儀長八人清平官見王不得佩劍唯羽儀長佩之為親信有六曹
長曹長有功補大軍將大軍將十二與清平官等列日議事王所
出治軍壁稱節度次補清平官有內算官代王裁處外算官記王
所處分以付六曹外則有六節度曰弄棟永昌銀生劍川柘東麗
水有二都督會川通海有十驗夷語驗若州曰雲南驗白厓驗亦
曰勃弄驗品澹驗迤川驗蒙舍驗大釐驗亦曰史驗直咩驗亦曰
陽驗蒙泰驗矣和驗趙川驗祁鮮山之西多瘴歊地平艸冬不枯
自曲靖州至滇池人水耕食蠶以柘蠶生閱二旬而蠶織錦縑精
緻大和祁鮮而西人不蠶剖波羅樹實狀如絮紐縷而幅之覽驗
井產鹽最鮮白惟王得食取足輒滅竈昆明城諸井皆產鹽不征
群蠻食之永昌之西野桑生石上其林上屈兩向而下植取以為

弓不筋漆而利名曰暝弓長川諸山往往有金或披沙得之麗水
多金越越賤之西多薦艸產善馬世稱越賤駿始生若羔歲中紐
莎磨之飲以米潘七年可御日馳數百里王出建八旗紫若青白
旂雉_雲二有旄鉞紫囊之翠蓋王母曰信摩亦曰九磨妃曰進武
信摩出亦建八旗絳旂自曹長以降繫金佉苴尚絳紫有功加錦
又有功加金波羅金波羅虎皮也功小者衿背不袖次止于衿婦
人不粉黛以蘇澤髮貴者綾錦裙襦上施錦一幅以兩股辮為鬟
髻耳綴珠貝瑟瑟虎魄女嫠婦與人亂不禁婚父私相送已嫁有
姦者皆抵死俗以寅為正四時大抵與中國小差膾魚寸以胡瓜
椒菽和之號鵝闕吹瓢笙笙四管酒至客前以笙推盞勸酬以繒
帛及貝市易貝者大若指十六枚為一覓師行人齋糧斗五升以
二千五百人為一營其法前傷者養治後傷者斬犁田以一牛三

夫前挽中壓後驅然專于農無貴賤皆耕不繇役人歲輸米二斗
一藝者給田二收乃稅王蒙氏父子以名相屬自舍老以來有譜
次可考舍老生獨邏亦曰細奴邏高宗時遣使者入朝賜錦袍細
奴邏生邏盛炎邏盛炎生炎閻武后時盛炎身入朝妻方娠生盛
邏皮喜曰我又子雖死唐地足矣炎閻立死開元時弟盛邏皮
立生皮邏閣授特進封臺登郡王炎閻未有子時以閣羅鳳為嗣
及生子還其宗而名承閣遂不改開元末皮邏閣逐河蠻取大和
城又襲大釐城守之因城龍口夷語山坡陀為和故謂大和以處
閣羅鳳天子詔賜皮邏閣名歸義當是時五詔徵歸義獨疆乃厚
以利啖劔南節度使王昱求合六詔為一制可歸義已并群蠻遂
破吐蕃寢驕太入朝天子亦為加禮又以破洱蠻功馳遣中人冊
為雲南王賜錦袍金鈿帶七事于是徙治大和城天寶初遣閣羅

鳳子鳳迦異入宿衛拜鴻臚卿恩賜良異七載歸義死閻羅鳳立襲王以其子鳳迦異爲陽瓜州刺史初安寧城有五鹽井人得煮鬻自給玄宗詔特進何履光以兵定南詔境取安寧城及井復立馬援銅柱乃還鮮于仲通領劔南節度使卞忿少方略故事南詔嘗與妻子謁都督過雲南太守張虔陀私之多所求丐閻羅鳳不應虔陀數詬斬之陰表其罪由是忿怨反發兵攻虔陀殺之取姚州及小夷州凡三十二明年仲通自將出戎儂州分二道進次曲州靖州閻羅鳳遣使者謝罪願還所虜得自新且城姚州如不聽則歸命吐蕃恐雲南非唐有仲通怒囚使者進薄白崖城大敗引還閻羅鳳斂戰齒築京觀逐北臣吐蕃吐蕃以爲弟夷謂弟鍾故稱贊普鍾給金印號東帝揭碑國門明不得已而叛嘗曰我上世世奉中國累封賞後嗣容歸之若唐使者至可指碑淚祝吾罪也會楊國忠以劔南節度當國乃調天下兵凡十萬使侍御史李宓討之輦餉者尚不在涉海而疫死相踵于道宓敗于大和城死者十八亦會安祿山反閻羅鳳因之取儂州會同軍據清溪關以破越析臬于贈西而降尋傳驃諸國尋傳蠻者俗無絲纊跣履榛棘不苦也射豪猪生食其肉戰以竹籠頭如兜鍪其西有裸蠻亦曰野蠻漫散山中無君長作檻舍以居男少女多無田農以木皮蔽形婦或十或五共養一男子廣德初鳳迦異築柘東城諸葛亮石刻故在文曰碑卽小蠻爲漢奴夷畏誓常以石指梧大曆十四年閻羅鳳以鳳迦異前死立其孫異牟尋以嗣異牟尋有智數善撫衆略知書母李獨錦蠻女也獨錦蠻亦烏蠻種在秦藏川南天寶中命其長爲蹄州刺史世與南詔婚聘異牟尋立悉衆二十萬入寇與吐蕃并力一趨茂州踰文川擾灌口一趨扶文掠方維白垣

一侵黎雅叩邛邽關令其下曰爲我取蜀爲東府工伎悉送邏娑城歲賦一縑于是進陷城聚人率走山德宗發禁衛及幽州軍以援東川與山南兵合大敗異牟尋衆斬首六千級禽生捕傷甚衆顛踣厓峭且十萬異牟尋懼更徙苴咩城築袤十五里吐蕃封爲日東王然吐蕃貢賦重數悉奪其險立營候歲索兵助防異牟尋稍苦之故西瀘令鄭回者唐官也往雋州破爲所虜閻羅鳳重其悖儒號蠻利俾教子弟得筭榜故國中無不憚後以爲清平官說異牟尋曰中國有禮義少求責非若吐蕃怙刻無極也今棄之復歸唐無遠戍勞利莫大此異牟尋善之稍謀內附然未敢發亦會節度使韋臯撫諸蠻有威惠諸蠻頗得異牟尋語白于臯時貞元四年也臯乃遣謀者遺書吐蕃疑之因責大臣子爲質異牟尋愈怨後五年乃決策遣使者三人異道同趨成都遺臯帛書曰異牟尋世爲唐臣曩緣張虔陀志在吞侮中使者至不爲澄雪舉部惶窘得生異計鮮于仲通比年舉兵故自新無繇代祖棄背吐蕃欺孤背約神川都督論訥舌使浪人利羅式眩惑部姓發兵無時今十二年此一忍也天禍蕃廷降豐蕭墻太子弟兄流竄近臣橫汗皆尚結贊陰計以行屠害平日功臣無一二在訥舌等皆冊封王小國奏請不令上達此二忍也又遣訥舌逼城于鄙樊邑不堪利羅式私取重賞部落皆驚此三忍也又利羅式罵使者曰滅子之將非我其誰子所富當爲我有此四忍也今吐蕃委利羅式甲士六十侍衛因知懷惡不謬此一難忍也吐蕃陰毒野心輒懷搏噬有如媮生實汗辱先人辜負部落此二難忍也往退渾王爲吐蕃所害孤遺受欺西山女王見奪其位拓拔首領竝蒙誅刈僕固志忠身亦喪亡每慮一朝亦被此禍此三難忍也往朝廷降使招撫

情心無二詔函信節皆送蕃廷雖知中夏至仁業爲蕃臣吞聲無
訴此四難忍也曾祖有寵先帝後嗣率蒙襲王人知禮樂本唐風
化吐蕃詐結百情懷惡相戚異牟尋願竭誠日新歸款天子請加
戍劔南西山涇原等州安西鎮守揚兵四臨委回鶻諸國所在侵
掠使吐蕃勢分力散不能爲疆此西南隅不煩天兵可以立功云
且贈臯黃金丹砂臯護送使者京師使者奏異牟尋請歸天子爲
唐藩輔獻金示順革丹赤心也德宗嘉之賜以詔書命臯遣謀往
覘臯令其屬崔佐時至羊苴咩城時吐蕃使者多在陰戒佐時衣
絳柯使者服以入佐時曰我乃唐使者安得從小夷服異牟尋夜
迎之設位陳燎佐時卽宣天子意異牟尋內畏吐蕃顧左右失色
流涕再拜受命使其子閻勸及清平官與佐時盟點蒼山載書四
一藏神祠石室一沈西洱水一置祖廟一以進天子乃發兵攻吐
蕃使者殺之刻金契以獻遣曹長段南羅趙迦寬隨佐時入朝初
吐蕃與回鶻戰殺傷甚乃調南詔萬人異牟尋欲襲吐蕃陽示寡
弱以五千人行許之卽自將數萬踵後晝夜行大破吐蕃于神川
遂斷鐵橋溺死以萬計得其五王乃遣弟湊羅棟清平官尹仇寬
等二十七人入獻地圖方物請復號南詔帝賜賚有加拜仇寬左
散騎常侍封高溪郡王明年夏六月冊異牟尋爲南詔王以祠部
郎中袁滋持節領使成都少尹龐頡副之崔佐時爲判官俱文珍
爲宣慰使劉幽巖爲判官賜黃金印文曰貞元冊南詔印滋至大
和城異牟尋遣兄蒙細羅勿等以良馬六十迎之金鏤玉珂兵振
鐸夾路陳異牟尋金甲蒙虎皮執雙鐸鞘執矛千人衛大象十二
引于前騎軍徒軍以次列詰旦授冊異牟尋率官屬北面立宣慰
使東向冊使南向乃讀詔冊相者引異牟尋去位跽授冊印稽首

再拜又授賜服備物退曰開元天寶中曾祖及祖皆蒙冊襲王自此五十年貞元皇帝洗痕錄功復賜爵命子子孫孫永爲唐臣因大會其下享使者出銀平脫馬頭盤二謂滋曰此天寶時先君以鴻臚少卿宿衛皇帝所賜也有笛工歌女皆垂白示滋曰此先君歸國時皇帝賜胡部龜茲音聲二列今喪亡略盡唯二人故在酒行異牟尋坐奉觴滋前滋授觴曰南詔當深思祖考成業抱忠竭誠永爲西南藩屏使後嗣有以不絕也異牟尋拜曰敢不承使者所命滋還復遣清平官尹輔首等七人謝天子獻鐸鞘浪劔鬱刃生金瑟瑟牛黃琥珀氎紡絲象犀越睽統倫馬鐸鞘者狀如殘刃有孔傍達出麗水飾以金所擊無不洞夷人尤寶月以血祭之鬱刃鑄時以毒藥并冶取迎躍如星者几十年乃成淬以馬血以金犀飾鐸首傷人卽死浪人所鑄故亦名浪劔王所佩者傳七世

矣異牟尋攻吐蕃復取昆明城以食鹽池又破施蠻順蠻竝虜其王置白崖城因定磨些蠻隸昆山西爨故地破茫蠻掠弄棟蠻漢裳蠻以實雲南東北施蠻者在鐵橋西北居大施睽斂尋睽男子衣繒布女分髮直額爲一髻垂後跣而衣皮順蠻本與施蠻雜居劔共諸川咩羅皮鐸羅望旣失遼川浪穹奪劔共地由是徙鐵橋在劔睽西北四百里號劔羌磨蠻些蠻與施順二蠻皆烏蠻種居鐵橋大婆小婆三探覽昆池等川土多牛羊俗不類澤男女衣皮俗好飲酒歌舞茫蠻本關南種茫其君號也或呼茫詔永昌之南有茫天連茫吐薺大睽茫昌茫鮮茫施大抵皆其種樓居無城郭或漆齒或金齒衣青布短袴露髻以繒布縗腰出其餘垂後爲飾婦人披五色婆羅籠象纒如牛養以耕弄棟蠻白蠻種也其部本居弄棟縣鄙地昔爲哀州有首領爲刺史誤殺其參軍挈族北走

後散居磨些江側故劔共諸川亦有之漢裳蠻本漢人部種在鐵橋惟以朝霞纏頭餘尚同漢服十五年異牟尋謀擊吐蕃以暹川寧北等城當寇路乃峭山深塹修戰備帝許出兵助力又請以大臣子弟質于臯臯辭固請乃盡舍成都咸遣就學且言昆明嚮州與吐蕃接不先加兵爲虜所脅反爲我患請臯圖之時唐兵比歲屯京西朔方大峙糧用南北竝攻取故地然南方轉饟稽期兵不悉集是夏虜麥不熟疫癘仍興贊普死新君立臯揣虜未敢動乃勸異牟尋緩舉萬全愈于速而無功今境上兵十倍往歲且行營皆在嚮州扼西瀘吐蕃路昆明弄棟可以無虞異牟尋請期它年吐蕃大臣以歲在辰兵宜出謀襲南詔閱衆治道將以十月圍嚮州軍屯昆明凡八萬皆命一歲糧贊普以舅攘都羅爲都統遣尚乞力欺徐濫鑠屯西貢川異牟尋與臯相聞臯命部將武免率弩

士三千赴之亢榮朝以萬人屯黎州韋良金以二萬五千人屯嚮州約南詔有急皆進軍過俄準添城者南詔創創吐蕃引衆五萬自曩貢川分二軍攻雲南一軍自諾濟城攻嚮州異牟尋畏東蠻磨些難測懼爲吐蕃鄉導欲先擊之臯報嚮州實往來道扞蔽數州虜百計窺之故嚴兵以守屯壁相望糧械處處有之東蠻庸敢懷貳乎異牟尋乃檄東磨些諸蠻內糧城中不者悉燒之吐蕃顯城將楊萬波約降事洩吐蕃以兵五千守臯將擊破之萬波與籠官拔顯城以來徙其人二千于宿川臯將扶忠義又取末攻城俘繫牛羊千計贊普大將旣煎讓律以兵距卜貢川一舍而屯國師馬定德率種落出降西貢節度監軍野多輸煎者贊普乞立贊養子當從先贊普殉亦請忠義降于是虜氣衰軍不振欺徐濫鑠至鐵橋南詔毒其水人多死乃徙納川壁以待是年虜霜雪早兵無

功還期以明年吐蕃苦唐詔倚角亦不敢圖南詔臯令免按兵
州節級鎮守雖南詔境亦所在屯戍吐蕃懲野戰數北乃屯三瀘
水遣論妄熱誘瀘諸蠻復城悉攝吐蕃險要也蠻酋潛導
南詔與臯部將杜毗羅狙擊十七年春夜絕瀘破虜屯斬五百級
虜係鹿危山毗羅伏以待又戰虜大奔于時康黑衣大食等兵及
吐蕃大酋皆降獲甲二萬首又合鬼主破虜于瀘西吐蕃君長共
計不得嚮州患未艾常爲兩頭蠻挾唐爲輕重謂南詔也會虜荐
飢方葬贊普調斂煩至是大料兵率三戶出一卒虜法爲大調集
又聞唐兵三萬人南詔乃大懼兵戍納川故洪諾濟臘聿賫五城
欲悉師出西山劔山收嚮州以絕南詔臯卽上言京右諸屯宜明
斥候蚤斂田邠隴焚萊可困虜入臯遣將邢毗以兵萬人屯南北
路趙昱萬人戍黎雅州異牟尋謂臯曰虜聲取嚮州實窺雲南請
武免督軍進羊且咩若虜不出者請以來年二月深入時虜兵三
萬攻鹽州帝以虜多詐疑繼以大軍詔臯深鈔賦鄯分虜勢臯表
賊精銳多置南屯今向鹽夏非全軍欲掠河曲党項畜產耳俄聞
虜破麟州臯督諸將分道出或自西山或由平夷或下隴陀和石
門或徑神川納川與南詔會是時回鶻太原邠寧涇原軍獵其北
劔南東川山南兵震其東鳳翔軍當其西蜀南詔深入克城七焚
塚百五十所斬首萬級獲鎧械十五萬圍昆明維州不能克乃班
師振武靈武兵破虜二萬涇原鳳翔軍敗虜原州惟南詔攻其腹
心俘獲最多帝遣中人尹偕尉異牟尋而吐蕃盛屯昆明神川納
川自守異牟尋比年獻方物天子禮之

南蠻列傳第一 百四十七上 終

西川節度使 氏書南州府

唐書二百二十二上

南蠻列傳第一 百四十七中

西川節度使 氏書南州府

唐書二百二十二中

元和三年異牟尋死詔太常卿武少儀持節弔祭子尋閣勸立或謂夢湊自稱驃信夷語君也改賜元和印章明年死子勸龍晟立淫肆不道上下怨疾十一年為弄棟節度王嵯巔所殺立其弟勸利詔少府少監李銑為冊立弔祭使勸利德嵯巔賜氏蒙封大容蠻謂兄為容長慶三年始賜印是歲死弟豐祐立豐祐趨敢善用其下慕中國不肯連父名穆宗使京兆少尹韋審規持節臨冊豐祐遣洪成酋趙龍些楊定奇入謝天子於是西川節度使杜元穎治無狀鄣候弛沓相蒙時大和三年也嵯巔乃悉眾掩邛戎巂三州陷之入成都止西郭十日慰賚居人市不擾肆將還乃掠子女工技數萬引而南人懼自殺者不勝計救兵逐嵯巔身自殿至大度河謂華人曰此吾南境爾去國當哭眾號慟赴水死者十三南

詔自是工文織與中國埒明年上表請罪比年使者來朝開成會
昌間再至大中時李琢爲安南經略使苛墨自私以斗鹽易一牛
夷人不堪結南詔將段酋遷陷安南都護府號白衣沒命軍南詔
發朱弩佞苴三千助守然朝貢猶歲至從者多杜悰自西川入朝
表無多內蠻慊豐祐怒卽慢言索質子會宣宗崩使者告哀是時
豐祐亦死坦綽酋龍立恚朝廷不弔卹又詔書乃賜故王以草具
進使者而遣遂僭稱皇帝建元建極自號大禮國懿宗以其名近
玄宗嫌諱絕朝貢乃陷播州安南都護李鄴屯武州咸通元年爲
蠻所攻棄州走天子斥鄴以王寬代之明年攻邕管經略使李弘
源兵少不能拒奔蠻州南詔亦引去詔殿中監段文楚爲經略使
數改條約衆不悅以胡懷王代之南詔知邊人因甚剽掠無有不
入寇杜悰當國爲帝謀遣使者弔祭示恩信并詔驃信以名嫌冊
命未可舉必易名乃得封帝乃命左司郎中孟穆持節往會南詔
陷雋州穆不行安南桃林人者居林西原七縮洞首領李由獨主
之歲歲戍邊李琢之在安南也奏罷防冬兵六千人謂由獨可當
一隊遏蠻之入蠻酋以女妻由獨子七縮洞舉附蠻王寬不能制
三年以湖南觀察使蔡襲代之發諸道兵二萬屯守南詔憚畏不
敢出會詔左庶子蔡京經制嶺南忌襲功有所欲沮壞之乃言南
方自無虞武夫倖功多聚兵耗餽運請還戍兵惜財用襲執不可
願畱五千兵累表不報卽極陳南詔伺隙久有十必死狀朝廷昏
肆不省也京還奏得意甚復詔爲宣慰安撫使卽建析廣州爲嶺
南東道邕州爲西道以龔象藤巖爲隸州乃拜京西道節度使京
褊伎貪克峻條令爲炮熏剝斫法下愁毒爲軍中所逐走藤州矯
制作攻討使印召鄉兵比道軍攻邕州不克衆潰貶死崖州以桂

管觀察使鄭愚代節度南詔攻交州進略安南襲請救發湖荆桂兵五千屯邕州嶺南韋宙奏南詔必襲邕管不先防近而圖遠恐擣虛絕糧道且深入乃詔襲按軍海門詔鄭愚分兵禦之襲請濟師以山南東道兵千人赴之南詔酋將楊思僭麻光高以兵六千薄城而屯四年正月攻益急襲錄異牟尋盟言繫矢上射入其營不答俄而城陷襲闔宗死者七十人幕府樊綽取襲印走度江荆南兵入東鄆苦戰斬南詔二千級是夜蠻遂屠城有詔諸軍保嶺南更以秦州經略使高駢爲安南都護帝見輸發頻罷遊幸不奏樂宰相杜悰以爲非是止之南詔稍逼邕州鄭愚自陳非將帥才願更擇人會康承訓自義成來朝乃授嶺南西道節度使發荆襄洪鄂兵萬人從之承訓辭兵寡乃大興諸道兵五萬往六月置行交州於海門進爲都護府調山東兵萬人益戍以容管經略使張茵鎮之因命經略安南茵逗留不敢進安南之陷將吏遣人多客伏溪洞詔所在招還抹卹之免安南賦入二年韋宙請分兵屯容藤披蠻勢五年南詔回掠雋州以搖西南西川節度使蕭鄴率屬蠻鬼主邀南詔大度河敗之明年復來攻會刺史喻士珍貪僧陰掠兩林東蠻口縛賣之以易蠻金故開門降南詔盡殺戍卒而士珍遂臣于蠻安南久屯兩河銳士死瘴毒者十七宰相楊收議罷北軍以江西爲鎮南軍募彊弩二萬建節度且地便近易調發詔可夏侯孜亦以張茵懦不足事悉以兵授高駢駢以選士五千度江敗林邑兵於邕州擊南詔龍州屯蠻酋燒貨畜走酋龍遣楊緝思助茵遷其守安南以范胙些爲安南都統趙諾眉爲扶邪都統七年六月駢次交州戰數勝士酣鬪斬其將張詮李差龍舉衆萬人降拔波風三壁緝思出戰敗還走城士乘之超堞入斬酋遷胙

些諾眷上首三萬級安南平初酋龍遣清平官董成等十九人詣成都節度使李福將廷見之成辭曰皇帝奉天命改正朔請以敵國禮見福不許導譯五返日壯士倦議不決福怒命武士摔辱之械繫于館俄而劉潼代福節度卽挺其繫表縱還有詔召成等至京師見別殿賜物良厚慰遣還國明年酋龍使楊酋慶等來謝釋囚初李師望建言成都經總蠻事曠日不能決請析邛蜀嘉眉黎雅巋七州爲定邊軍建節度制機事近且速天子謂然卽詔師望爲節度使治邛州邛距成都才五舍巋州最南去邛乃千里緩急首尾不相副而師望利專制諱不言哀積無厭私賄以百萬計又欲激蠻怒幸有功乃殺酋慶等旣而戍士怒將醢師望以逞會召還以竇滂代之滂沓冒尤不法誅責苛纖甚師望時蠻役未興而定邊已困酋龍怨殺其使十年乃入寇以軍綴青溪關密引衆伐

木開道徑雪岐盛夏卒凍死者二千人出沐源闕嘉州破屬蠻遂次沐源滂遣苑海兵五百往戰一軍覆酋龍乃身自將督衆五萬侵巋州攻青溪關屯將杜再榮絕大度河走諸屯皆退保北涯蠻攻黎州詭服漢衣濟江襲犍爲破之裴回陵榮間焚廬舍掠糧畜薄嘉州刺史楊恣與南詔夾江而軍士攢射蠻不得進陰自上游濟背擊王師殺忠武將顏慶師恣走嘉州陷明年正月攻杜再榮滂自勒兵戰酋龍遣使者十輩請和滂信之語未半蠻桴爭岸譟而進滂不知所爲將自殺武寧將苗全緒止之殊死戰蠻稍卻滂乃遁全緒殿而行黎州陷人走匿山谷蠻掠金帛不勝負入自邛峽關圍雅州遂擊邛州是冬滂棄州壁導江儲貲峙械皆亾矣酋龍進攻成都次巋州坦綽杜元忠日夜教酋龍取全蜀於是西川節度使盧耽遣其副王偃中人張思廣約和蠻彊之使南面拜然

卒不見酋龍而還蠻次新津耽復遣副譚奉祀好言申約蠻畱之
耽畏援軍未集卽飛請天子降大使通好以紓其深入懿宗馳遣
太僕卿支詳爲和蠻使蠻本無謀不能乘機會鼓行亟驅但虬結
蠅營恟鹵剽小利處處畱屯故蜀孺老得扶攜悉入成都闔里皆
滿戶所占地不得過一牀雨則冒箕益自庇城中井爲竭則共飲
摩訶池至爭捽溺死者或筮沙取滴飲之死不能具棺卽共坎瘞
故瀘州刺史楊慶復爲耽治攻具蘭石置牢城兵八將主之樹篋
格夜列炬照城守具雄新又選悍士三千號突將爲長刀巨槌斧
分左右番休日隸于軍士心侈欲鬪而酋龍自雙流徐行內欲報
董成之辱因給耽請上介至軍議事耽遣節度副使柳槃往見杜
元忠議和元忠妄言帝見耽請具車蓋葆嬰槃未能決還蠻以三
百騎負帳幕來大言曰供帳陷蜀王聽事爲驃信行在耽不許乃

馳去蠻稍前傅外郛於是游弈使王晝督援兵三千屯毗橋實滂
亦以其軍自導江來將與大軍犄角然戰不甚力小不勝卽保廣
漢自以失定邊覬成都陷得薄其罪會有詔斥徙軍遂無功耽部
將李自孝者與刺史喻士珍善士珍臣蠻自孝陰與賊通乃說耽
城下蒔葦稻瀦水頽城舉府不之覺蠻攻城自孝守陴樹麾以自
表麾所指蠻輒攻之爲下所覺耽殺自孝以徇城左有民樓肆蠻
俯射城中耽募勇士燒之器械俱盡二月蠻以雲梁驚車四面攻
七叫譟驚車未至陴者以巨索鉤係投膏炬車焚箱間蠻卒盡死
耽遣李壽張察率突將戰城下俘斬二千級蠻徹民鄣落爲蓬籠
如車輦下設枕木推而前不及城丈匿蠻其內以穴墉楊恣以嬰
貯糞瀦浞蠻蠻不能處注以鐵液蓬籠皆火然南詔負衆益治器
械斧斤晝夜有聲將擊錦樓衆失色耽遣將出三面苦戰蠻引却

蠻利夜晦輒薄城聞呼嘯衆齊奮城上施鐵籠千炬賊來不得隱屯夫終夜哄蠻不能侵支詳遣諜與約好且謂耽毋多殺以速蠻和是時傳言救師至城中合謀開門士爭出迎軍南詔搏戰不解日入判官程克裕以北門兵二千乘之蠻乃走耽猶遣之書謝不得已交兵且請和士脫鎧迎支詳詳陳所齎植二旗署曰賜雲南幣物謂蠻使者曰天子詔雲南和解而兵薄成都奈何請退舍撤警以修好或勸詳蠻多詐毋入死地詳不行蠻復圍成都夜穿西北隅犁旦乃覺卽頽焚火于壩蠻皆死穴中以鐵絙曳雲棚仆之燎作少選盡益固守是時帝遣東川節度使顏慶復爲大度河制置劔南應接使兵次新都博野將曾元裕敗蠻兵斬二千級南詔騎數萬晨壓官軍以騁大將宋威以忠武兵戰斬首五千獲馬四百尾南詔退屯星宿山威進戍沱江酋龍遣酋望至支詳所請和詳曰今列城固守北軍望功歸語而主審自度耽遣銳將趣蠻壁燒攻具殺二千人爲南詔所躡卻而潰蠻聞鳳翔山南軍且來乃迎戰毗橋不勝趨沱江爲伏士所擊又敗城中出突將夜火蠻營酋龍坦綽身督戰後三日王師奪昇遷梁蠻大敗夜燒亭傳乘火所向兩矢射王師威疏軍行嚮矢所發叢射之兩軍不能決各解去酋龍知不敵夜徹營南奔至雙流江無梁計窮將赴水死或止之曰今北軍與成都兵合若來追我無類矣不如僞和以紓急不然死未晚乃來請三日梁成而濟卽斷梁接隊緩驅黎州刺史嚴師本收散卒保邛州酋龍懼圍二日去蠻俘華民必劓耳鼻已縱之旣而居人刻木爲耳鼻者什八慶復之來衆以其弟慶師死于蠻必甘心及成都不破以已功輕乃按軍廣溪縱殘寇人人切齒初成都無隍塹乃教耽濬隍廣三丈作戰棚于埤列左右屯營營

別五區區卒五十時阜莢夾壕後三年合拱又爲大旌連弩自是
南詔憚之酋龍年少嗜殺戮親戚異已者皆斬兵出無寧歲諸國
更讎忿屢覆衆國耗虛蜀之役男子十五以下悉發婦耕以餉軍
十四年坦綽復寇蜀組舟大度河以濟爲刺史黃景復擊却之衆
循河而南夜桴上流兵夾攻瀕水諸屯景復敗走還黎州蠻躡追
爲景復所敗會蠻踵來還攻大度河仆旗息鼓請曰坦綽欲上書
天子白寃事成兵信之不戰橋成而濟黎州陷遂攻雅州擊定邊
軍卒潰入邛州成都大震人入玉壘關士乘城坦綽遣使者王
保成等四十人齎驃信書遺節度使牛叢欲假道入朝請憇蜀王
故殿叢欲許之楊慶諫曰蠻無信彼禮屈辭甘詐我也請斬其使
畱二人還書叢因責之曰詔王之祖六詔最夷也天子錄其勤
合六詔爲一俾附庸成都名之以國許子弟入太學使習華風今
乃自絕王命且蛇雀犬馬猶能報德王乃不如蟲鳥乎比成都以
武備未修故令爾突我疆場然毗橋沱江之敗積弊附城不四年
復來今吾有十萬衆捨其半未用以千人爲軍十軍爲部驍將主
之凡部有彊弩二百縛斧輔之勁弓二百越銀刀輔之長戈二百
擐刀輔之短矛二百連鎚輔之又軍四面面有鐵騎五百悉收芻
薪米粟牛馬犬豕清野待爾吾又能以旁騎略爾樵采我日出以
一部與爾戰部別二番日中而代日昃一部至以夜屯月明則戰
黑則休夜半而代凡我兵五日一殺敵爾乃晝夜戰不十日懣且
死矣州縣繕甲厲兵犄角相從皆蠻之深讎雖女子能齟齬薄賊
況疆夫烈士哉爾祖嘗奴事西蕃爲爾仇家今顧臣之何恩讎之
戾邪蜀王故殿先世之寶宮非邊夷所宜舍神怒人憤驃信且死
叢猶火郊民室廬觀閣嚴兵爲固守計坦綽至新津而還回寇黔

中經略使秦匡謀懼奔荆南會僖宗立遣金吾將軍韓重持節往使俄攻黎州景復擊走之乾符元年劫略巂雅間破黎州入邛崃關掠成都成都閉三日蠻乃去詔徙天平軍高駢領西川節度使乃奏蠻小醜勢易制而蜀道險館饜窮乏今左神策所發長武河東兵多用度繁廣且彼皆扼制羌戎不可以弛備詔乃罷長武等兵駢至不淹月閱精騎五千逐蠻至大度河奪鎧馬執酋長五十斬之收邛崃關復取黎州南詔遣還駢召景復責大度河之敗斬以徇戍望星清溪等關南詔懼遣使者詣駢結好而踵出兵寇邊駢斬其使初安南經略判官杜巖爲蠻所俘其妻宗室女也故酋龍使奉書丐和駢答曰我且將百萬衆至龍尾城問爾罪酋龍大震自南詔叛天子數遣使至其境酋龍不肯拜使者遂絕駢以其俗尚浮屠法故遣浮屠景仙攝使往酋龍與其下迎謁且拜乃定盟而還遣清平官酋望趙宗政質子三十人朝乞盟請爲兄弟若舅甥詔拜景仙鴻臚卿檢校左散騎常侍駢結吐蕃尚延心嗚末魯耨月等爲間築戎州馬湖沐源川大度河三城列屯拒險料壯卒爲平夷軍南詔氣奪酋龍肅發疽死僞諡景莊皇帝子法嗣改元貞明承智大同自號大封人法年少好畋獵酣逸衣絳紫錦屬鏤金帶國事頗決大臣乾符四年遣陀西段琬寶詣邕州節度使辛讜請修好詔使者荅報未幾寇西川駢奏請與和親右諫議大夫柳韜吏部侍郎崔澹醜其事上言遠蠻畔逆乃因浮屠誘致又議和親垂笑後世駢職上將謀乖繆不可從遂寢蠻使者再入朝議和親而駢徙荆南持前請不置宰相鄭畋盧攜爭不決皆賜罷辛讜遣幕府徐雲虔攝使者往覘到善闡府見騎數十曳長矛擁絳服少年朱繒約髮典客伽陀酋孫慶曰此驃信也問天子起居

下馬揖客取使者佩刀視之自解左右鈕以示乃除地割三丈版命左右馳射每一人射法駮馬逐以爲樂數十發止引客就幄俵子捧瓶盃四女子侍樂飲夜乃罷又遣問客春秋大義送使者還是時駢徙節鎮海効澹等沮議帝蒙弱不能曉下詔尉解西川節度使崔安潛上言蠻蓄鳥獸心不識禮義安可以賤隸尚貴主失國家大體澹等議可用臣請募義征子率十戶一保願發山東銳兵六千戍諸州比五年蠻可爲奴久之帝手詔問安潛和親事答曰雲南姚州譬一縣中國何資於彼而遣重使加厚禮彼且妄謂朝廷畏怯無能爲脫有它請陛下何以待之且天宗近屬不可下小蠻夷臣比移書不言舅甥黜所僭也有如蠻使者不復至當遣謀人伺其隙可以得志南詔知甸彊故襲安南陷之都護曾袞奔邕府戍兵潰會西川節度使陳敏瑄中和親議時盧攜復輔政與豆盧瑑皆厚駢乃譎說帝曰陛下初卽位遣韓重使南詔將官屬畱蜀暮年費不貲蠻不肯迎及駢節度西川招熅末繕甲訓兵蠻夷震動遣趙宗政入獻見天子附驃信再拜雲虔之使驃信答拜其於禮不爲少宣宗皇帝收三州七關平江嶺以南至大中十四年內庫貲積如山戶部延資充滿故宰相敏中領西川庫錢至三百萬緡諸道亦然咸通以來蠻始叛命再入安南邕管一破黔州四盜西川遂圍盧耽召兵空東方戍海門天下騷動十有五年賦輸不內京師者過半中藏罕空虛士死瘴癘燎骨傳灰人不念家亾命爲盜可爲痛心前年畱宗政等南方無虞及遣還彼猶冀望豪法立三年比兵不出要防其蓄力以間我虞今朝廷府庫匱甲兵少牛叢有北兵七萬首尾奔衝不能救况安南客戍單寡涉冬寇禍可虞誠命使者臨報縱未稱臣且伐其謀外以縻服蠻夷內得蜀

休息也帝謂然乃以宗室女爲安化長公主許婚拜嗣曹王龜年
宗正少卿爲雲南使大理司直徐雲虔副之內常侍劉光裕爲雲
南內使霍承錫副之及還具言驃信誠款以爲敬瑄功故進檢校
司空賜一子官法遣宰相趙隆眉楊奇混段義宗朝行在迎公主
高駢自揚州上言三人者南詔心腹也宜止而鳩之蠻可圖也帝
從之隆眉等皆死自是謀臣盡矣蠻益衰中和元年復遣使者來
迎主獻珍怪氈罽白牀帝以方議公主車服爲解後二年又遣布
燮楊奇肱來迎詔檢校國子祭酒張譙爲禮會五禮使徐雲虔副
之宗正少卿嗣虢王約爲婚使未行而黃巢平帝東還乃歸其使
法死僞諡聖明文武皇帝号舜化立建元中興遣使款黎州修好
昭宗不答後中國亂不復通先是有時傍矣川羅識二族通號八
詔時傍母歸義女也其女復妻閻羅鳳初咩羅皮之敗時傍入居
遼川州誘上浪千餘勢稍張爲閻羅鳳所猜徙置白崖城後與矣
川羅識詣神川都督求自立爲詔謀洩被殺矣川羅識奔神川都
督送之羅些城

蒙嵩詔最大其王嵩輔首死無子弟佉陽照立佉陽照死子照原
立喪明子原羅質南詔歸義欲并國故歸其子原之衆果立之居
數月使人殺照原逐原羅遂有其地

越析詔或謂磨些詔居故越析州西距曩葱山一日行貞元中有
豪酋張尋求丞其王波衝妻因殺波衝劔南節度使召尋求至姚
州殺之部落無長以地歸南詔波衝兒子于贈持王所寶鐸鞘東
北度瀘邑于龍佉河纔百里號雙舍使部酋楊墮居河東北歸義
樹壁侵于贈不克閻羅鳳自請往擊楊墮破之于贈投瀘死得鐸
鞘故王出軍必雙執之

浪穹詔其王豐時死子羅鐸立羅鐸死子鐸羅望立爲浪穹州刺史與南詔戰不勝其部實劔川更稱劔浪死子望偏立望偏死子偏羅矣立偏羅矣死子羅君立貞元中南詔擊破劔川虜羅君徙永昌凡浪穹遼跋施浪總謂之浪人亦稱三浪

遼跋詔其王豐咩初據遼跋爲御史李知古所殺子咩羅皮自爲遼川州刺史治大釐城歸義襲敗之復入遼跋與浪穹施浪合拒歸義旣戰大敗歸義奪遼跋咩羅皮走保野共川死子皮羅鄧立皮羅鄧死子鄧羅顛立鄧羅顛死子顛文託立南詔破劔川虜之徙永昌

施浪詔其王施望久居矣直和城有施各皮者亦入詔之裔據石和城閭羅鳳攻虜之而施望久孤立故與咩羅皮合攻歸義不勝歸義以兵脅降其部施望久以族走永昌獻其女遺南詔丐和歸義許之度蘭江死弟望千走吐蕃立爲詔納之劔川衆數萬望千死子千傍羅顛立南詔破劔川千傍羅顛走瀘北三浪悉滅唯千傍羅顛及矣川羅識子孫在吐蕃

贊曰唐之治不能過兩漢而地廣於三代勞民費財禍所繇生晉獻公殺嫡賊二公子號爲闇君明臯一日殺三庶人昏蔽甚矣嗚呼父子不相信而遠治閭羅鳳之罪士死十萬當時寃之懿宗任相不明藩鎮屢畔南詔內侮屯戍思亂靡勛乘之倡戈橫行雖凶渠穢夷兵連不解唐遂以亾易曰喪牛于易有國者知戒西北而不知患生於無備漢亾於董卓而兵兆于冀州唐亾于黃巢而禍基於桂林易之意深矣

基林林長之意然矣

不似患事於無所與心於董卓而其迷于莫此與心于黃巢而
與趙夷其意不測也後以心易曰夷平于是有國昔映浙西北而
麻不即華為安南端內則少其思也則乘之即又難示錐凶
利父子不計而表合開羅鳳之業士以十萬當部吏之續宗并
熾公遂歛烟二公子盡為開羅鳳即皇一且錄三熟人吞齋其笑也
贊曰書之亦不計而表合開羅鳳之業士以十萬當部吏之續宗并
南蠻列傳又笑川羅端于終并世蕃

派于于對羅頭立南請如險以于對羅頭去盡北三豕悉滅于
善信之與蘭以派榮望于去扣簪立為臨險之險似眾獲萬望于
南蠻列傳第一百四十七下

唐書二百一十二下

環王本林邑也一曰占不勞亦曰占婆直交州南海行三千里地
東西三百里而羸南北千里西距真臘霧溫山南抵奔浪陀州其
南大浦有五銅柱山形若倚蓋西重巖東涯海漢馬援所植也又
有西屠夷蓋援還留不去者才十戶隋末孽衍至三百皆姓馬俗
以其寓故號馬留人與林邑分唐南境其地冬溫多霧雨產琥珀
猩猩獸結遼鳥以二月為歲首稻歲再熟取檳榔瀋為酒椰葉為
席俗凶悍果戰鬥以麝塗身口再塗再澡拜謁則合爪頓顙有文
字喜浮屠道冶金銀像大或十圍呼王為陽蒲逋王妻為陀陽阿
熊太子為阿長逋宰相為婆娑地王所居曰占城別居曰齊國曰
蓬皮勢王衣白氎古貝斜絡臂飾金琲為纓髮戴金華冠如章
甫妻服朝霞古貝短裙冠纓如王王衛兵五千戰乘象藤為鏡竹

爲弓矢率象千馬四百分前後不設刑有罪者使象踐之或送不勞山界自死隋仁壽中遣將軍劉芳伐之其王范梵志挺走以其地爲三郡置守令道阻不得通梵志哀遣衆別建國邑武德中再遣使獻方物高祖爲設九部樂饗之貞觀時王頭黎獻馴象鏐鎖五色帶朝霞布火珠與婆利羅刹二國使者偕來林邑其言不恭羣臣請問罪太宗曰昔苻堅欲吞晉衆百萬一戰而亡隋取高麗歲調發人與爲怨乃死匹夫手朕敢妄議發兵邪赦不問又獻五色鸚鵡白鸚鵡數訴寒有詔還之頭黎死子鎮龍立獻通天犀雜寶十九年摩訶慢多伽獨弒鎮龍滅其宗范姓絕國人立頭黎壻婆羅門爲王大臣共廢之更立頭黎女爲王諸葛地者頭黎之姑子父得罪奔真臘女之王不能定國大臣共迎諸葛地爲王妻以女永徽至天寶凡三人獻至德後更號環王元和初不朝獻安南都護張舟執其僞驪愛州都統斬三萬級虜王子五十九獲戰象舠鎧婆利者直環王東南自交州汎海歷赤土丹丹諸國乃至地大洲多馬亦號馬禮表長數千里多火珠大者如雞卵園白照數尺日中以艾藉珠輒火出產瑇瑁文螺石坭初取柔可治旣鏤刻卽堅有舍利鳥通人言俗黑身朱髮而拳鷹爪獸牙穿耳傅璫以古貝橫一幅繚于腰古貝草也緝其花爲布粗曰貝精曰氎俗以夜爲市自掩其面王姓刹利邪伽名護路那婆世居位繚班絲貝綴珠爲飾坐金榻左右持日拂孔雀嬰出以象駕車羽蓋珠箔鳴金擊鼓歛蠶爲樂其東卽羅刹也與婆利同俗隋煬帝遣常駿使赤土遂通中國赤土西南入海得婆羅總章二年其王旃達鉢遣使者與環王使者偕朝環王南有殊奈者汎交趾海三月乃至與婆羅同俗貞觀二年使者上方物九年甘棠使者入朝國居海南

十二年僧高武令迦乍鳩密四國使者朝貢僧高直水真臘西北與環王同俗其後鳩密王尸利鳩摩又與富那王尸利提婆跋摩等遣使來貢僧高等國永徽後爲真臘所并

盤盤在南海曲北距環王限少海與狼牙修接自交州海行四十日乃至王曰楊粟翬其民瀕水居北木爲柵石爲矢鏃王坐金龍大榻諸大人見王交手抱肩以蹠其臣曰敦郎索濫曰崑崙帝也曰崑崙勃和曰崑崙教諦索甘亦曰古龍古龍者崑崙聲近耳在外曰那延猶中國刺史也有佛道士祠僧食肉不飲酒道士謂爲貪不食酒肉貞觀中再遣使朝其東南有哥羅一曰箇羅亦曰哥羅富沙羅王姓矢利波羅名米失鉢羅累石爲城樓闕宮室茨以草州二十四其兵有弓矢稍及以孔雀羽飾纛每戰以百象爲一隊一象百人鞍若檻四人執弓矟在中賦率輸銀二銖無絲紵惟古貝畜多牛少馬非有官不束髮凡嫁娶納檳榔爲禮多至二百盤婦已嫁從夫姓樂有琵琶橫笛銅鈸鐵鼓蠡死者焚之取燼貯金罌沈之海東南有拘婁蜜海行一月至南距婆利行十日至東距不述行五日至西北距文單行六日至與赤土墮和羅同俗永徽中獻五色鸚鵡

扶南在日南之南七千里地卑窪與環王同俗有城郭宮室王姓古龍居重觀柵城楛葉以覆屋王出乘象其人黑身鬚髮裸行俗不爲寇盜田一歲種三歲穫國出剛金狀類紫石英生水底石上人沒水取之可以刻玉扣以玦角乃泮人喜鬪雞及猪以金珠香爲稅治特牧城俄爲真臘所并益南徙那弗那城武德貞觀時再入朝又獻白頭人二白頭者直扶南西人皆素首膚理如脂居山穴四面峭絕人莫得至與參半國接

真臘一曰吉蔑本扶南屬國去京師二萬七百里東距車渠西屬
驃南瀕海北與道明接東北抵驩州其王刹利伊金那貞觀初并
扶南有其地戶皆東嚮坐上東客至屑檳榔龍腦香蛤以進不飲
酒比之淫與妻飲房中避尊屬有戰象五千良者飼以肉世與參
半驃通好與環王乾陀洹數相攻自武德至聖曆凡四來朝神龍
後分爲二半北多山阜號陸真臘半南際海饒陂澤號水真臘半
水真臘地八百里王居婆羅提拔城陸真臘或曰文單曰婆鏤地
七百里王號宜屈開元天寶特王子率其屬二十六來朝拜果毅
都尉大曆中副王婆彌及妻來朝獻馴象十一擢婆彌試殿中監
賜名實漢是時德宗初卽位珍禽奇獸悉縱之蠻夷所獻馴象畜
苑中元會充廷者凡三十二悉放荆山之陽及元和中水真臘亦
遣使入貢文單西北屬國曰參半武德八年使者來道明者亦屬
國無衣服見衣服者共笑之無鹽鐵以竹弩射鳥獸自給

訶陵亦曰社婆曰閣婆在南海中東距婆利西愷婆登南瀕海北
真臘木爲城雖大屋亦覆以柢欄象牙爲牀若席出瑇瑁黃白金
犀象國最富有穴自湧鹽以柢花椰子爲酒飲之輒醉宿昔壞有
文字知星曆食無匕筋有毒女與接輒苦瘡人死尸不腐王居閣
婆城其祖吉延東遷於婆露伽斯城旁小國二十八莫不臣服其
官有三十二大夫而大坐敢兄爲最貴山上有郎卑野州王常登
以望海夏至立八尺表景在表南二尺四寸貞觀中與愷和羅愷
婆登皆遣使者入貢太宗以璽詔優答愷和羅巧良馬帝與之至
上元間國人推女子爲王號悉莫威令整肅道不舉遺大食君聞
之齎金一囊置其郊行者輒避如是三年太子過以足躡金悉莫
怒將斬之羣臣固請悉莫曰而罪實本於足可斷趾羣臣復爲請

乃斬指以徇大食聞而畏之不敢加兵大曆中訶陵使者三至元和八年獻僧祇奴四五色鸚鵡頻伽鳥等憲宗拜內四門府左果毅使者讓其弟帝嘉美竝官之訖大和再朝貢咸通中遣使獻女樂憶和羅亦曰獨和羅南距盤盤北迦邏舍弗西屬海東真臘自廣州行五月乃至丑國多美犀世謂憶和羅犀有二屬國曰曇陵陀洹曇陵在海洲中陀洹一曰耨陀洹在環王西南海中與憶和羅接自交州行九十日乃至王姓察失利名婆那字婆末無蠶桑有稻麥麻豆畜有白象牛羊豬俗喜樓居謂爲干欄以白氎朝霞布爲衣親喪在室不食燔屍已則剔髮浴于池然後食貞觀時竝遣使者再入朝又獻婆律膏白鸚鵡首有十紅毛齊于翅因丐馬銅鍾帝與之憶婆登在環王南行二月乃至東訶陵西迷黎車北屬海俗與訶陵同種稻月一熟有文字以貝多葉寫之死者實金于

口以釧貫其體加婆律膏龍腦衆香積薪燔之

投和在真臘南自廣州西南海行百日乃至王姓投和羅名脯邪迄遙官有朝請將軍功曹主簿贊理贊府分領國事分州郡縣三等州有參軍郡有金威將軍縣有城有局長官得選僚屬自助民居率樓閣畫壁王宿衛百人衣朝霞耳金銀金縷被頸寶飾革履頻盜者死次穿耳及頰而劓其髮盜鑄者截手無賦稅民以地多少自輸王以農商自業銀作錢類榆莢民乘象及馬無鞍勒繩穿頰御之親喪斷髮爲孝焚尸斂灰于巽沈之水貞觀中遣使以黃金函內表并獻方物

瞻博或曰瞻婆北距兢伽河多野象羣行顯慶中與婆岸干支弗舍跋若磨臘四國竝遣使者入朝干支在西南海中本南天竺屬國亦曰半支跋若唐言五山也北距多摩婁又有哥羅舍分脩羅

分甘畢三國貢方物甘畢在南海上東距環王王名旃陀越摩有
勝兵五千哥羅舍分者在南海南東憶和羅修羅分者在海北東
距真臘其風俗大略相類有君長皆柵郭二國勝兵二萬甘畢才
五千又有多摩菴東距婆鳳西多隆南千支弗北訶陵地東西一
月行南北二十五日行其王名骨利詭云得大卵剖之獲女子美
色以爲妻俗無姓婚姻不別同姓王坐常東向勝兵二萬有弓刀
甲稍無馬果有波那婆宅護遮菴摩石榴其國經薩盧都訶盧君
那盧林邑諸國乃得交州顯慶中貢方物

室利佛逝一曰尸利佛誓過軍徒弄山二千里地東西千里南北
四千里而遠有城十四以二國分總西曰郎婆露斯多金汞砂龍
腦夏至立八尺表影在表南二尺五寸國多男子有橐它豹文而
犀角以乘且耕名曰它牛豹又有獸類野豕角如山羊名曰雪肉

味美以饋膳其王號曷蜜多咸亨至開元間數遣使者朝表爲邊
吏侵掠有詔廣州慰撫又獻侏儒僧祇女各二及歌舞官使者爲
折衝以其王爲左威衛大將軍賜紫袍金鈿帶後遣子入獻詔宴
于曲江宰相會冊封賓義王授右金吾衛大將軍還之

名蔑東接真陀桓西但游南屬海北波刺其地一月行有州三十
以十二月爲歲首王衣朝霞氎賦二十取一交易皆用金準直其
人短小兄弟共娶一妻婦總髮爲角辨夫之多少王號斯多題龍
朔初使者來貢

單單在振州東南多羅磨之西亦有州縣木多白檀王姓剎利名
尸陵伽日視事有八大臣號八坐王以香塗身冠雜寶瓔近行乘
車遠乘象戰必吹蠡擊鼓盜無輕重皆死乾封總章時獻方物羅
越者北距海五千里西南哥谷羅商賈往來所湊集俗與憶羅鉢

底同歲乘舶至廣州州必以聞
驃古朱波也自號突羅朱閣婆國人曰徒里拙在永昌南二千里
去京師萬四千里東陸真臘西接東天竺西南憊和羅南屬海北
南詔地長三千里廣五千里東北袤長屬羊苴咩城凡屬國十八
曰迦羅婆提曰摩禮烏特曰迦黎迦曰半地曰彌臣曰坤朗曰偈
奴曰羅聿曰佛代曰渠論曰婆梨曰偈陀曰多歸曰摩曳餘卽舍
衛瞻婆闍婆也凡鎮城九曰道林王曰悉利移曰三陀曰彌諾道
立曰突旻曰帝偈曰達梨謀曰乾唐曰末浦凡部落二百九十八
以名見者三十二曰萬公曰充惹曰羅君潛曰彌綽曰道雙曰道
甕曰道勿曰夜半曰不惡奪曰莫音曰伽龍睽曰阿梨吉曰阿梨
闍曰阿梨忙曰達磨曰求潘曰僧塔曰提梨郎曰望騰曰擔泊曰
祿烏曰乏毛曰僧迦曰提追曰阿未邏曰逝越曰騰陵曰歐咩曰
碼羅婆提曰祿羽曰陋蠻曰磨地勃繇彌臣至坤朗又有小崑崙
部王名茫悉越俗與彌臣同繇坤朗至祿羽有大崑崙王國王名
思利泊婆難多珊那川原大於彌臣繇崑崙小王所居半日行至
磨地勃柵海行五月至佛代國有江支流三百六十其王名思利
些彌他有川名思利毗離芮土多異香北有市諸國估舶所湊越
海卽闍婆也十五日行踰二大山一曰正迷一曰射鞞有國其王
名思利摩訶羅闍俗與佛代同經多茸補邏川至闍婆八日行至
婆賄伽盧國土熱衢路植椰子檳榔仰不見日王居以金爲甃厨
覆銀瓦爨香木堂飾明珠有二池以金爲隄舟楫皆飾金寶驃王
姓困沒長名摩羅惹其相名曰摩訶思那王出輿以金繩牀遠則
乘象嬪史數百人青甃爲圍城周百六十里有十二門四隅作浮
圖民皆居中鈔錫爲瓦荔支爲材俗惡殺拜以手抱臂稽顙爲恭

明天文喜佛法有百寺琉璃爲璧錯以金銀丹彩紫鑛塗地覆以錦罽王居亦如之民七歲祝髮止寺至二十有不達其法復爲民衣用白氎朝霞以蠶帛傷生不敢衣戴金花冠翠冒絡以雜珠王宮設金銀二鍾寇至焚香擊之以占吉凶有巨白象高百尺訟者焚香跽象前自思是非而退有災疫王亦焚香對象跽自咎無桎梏有罪者束五竹捶背重者五輕者三殺人則死土宜菽粟稻梁蔗大若脰無麻麥以金銀爲錢形如半月號登伽佗亦曰足彈陀無膏油以蠟雜香代炷與諸蠻市以江猪白氎琉璃罌缶相易婦人當頂作高髻飾銀珠琲大青娑裙披羅段行持扇貴家者傍至五六近城有沙山不毛地亦與波斯婆羅門接距西舍利城二十日行西舍利者中天竺也南詔以兵疆地接常羈制之貞元中王雍羌聞南詔歸唐有內附心異牟尋遣使楊加明詣劍南西川節度使韋臯請獻夷中歌曲且令螺國進樂人於是臯作南詔奉聖樂用正律黃鍾之均宮徵一變象西南順也角羽終變象戎夷革心也舞六成工六十四人贊引二人序曲二十八疊舞南詔奉聖樂字舞人十六執羽翟以四爲列舞南字歌聖主無爲化舞詔字歌南詔朝天樂舞奉字歌海宇修文化舞聖字歌雨露覃無外舞樂字歌闕土丁零塞皆一章三疊而成舞者初定執羽簫鼓等奏散序一疊次奏第二疊四行贊引以序入將終雷鼓作於四隅舞者皆拜金聲作而起執羽稽首以象朝覲每拜跪節以鉦鼓次奏拍序一疊舞者分左右蹈舞每四拍揖羽稽首拍終舞者拜復奏一疊蹈舞拊揖以合南字字成徧終舞者北面跪歌導以絲竹歌已俯伏鉦作復揖舞餘字皆如之唯聖字詞末皆恭揖以明奉聖每一字曲三疊名爲五成次急奏一疊四十八人分行罄折象形

臣禦邊也字舞畢舞者十六人爲四列又舞闕四門之舞遠舞入徧兩疊與鼓吹合節進舞三退舞三以象三才三統舞終皆稽首逡巡又一人舞億萬壽之舞歌天南滇越俗四章歌舞七疊六成而終七者火之成數象天子南面生成之恩六者坤數象西南向化凡樂三十工百九十六人分四部一龜茲部二大鼓部三胡部四軍樂部龜茲部有羯鼓指鼓腰鼓雞婁鼓短笛大小箏築拍板皆八長短簫橫笛方響大銅鈸貝皆四凡工八十八人分四列屬舞筵四隅以合節鼓大鼓部以四爲列凡二十四居龜茲部前胡部有箏大小笙篪五絃琵琶笙橫笛短笛拍板皆八大小箏築皆四工七十二人分四列屬舞筵之隅以導歌詠軍樂部金鐃金鐸皆二柶鼓金鈺皆四鈺鼓金飾蓋垂流蘇工十二人服南詔服立闕四門舞筵四隅節拜合樂又十六人畫半臂執柶鼓四人爲列舞人服南詔衣絳裙襦黑頭囊金佉其畫皮鞞首飾袂額冠金寶花鬘襦上復加畫半臂執羽翟舞俯伏以象朝拜裙襦畫鳥獸草木文以八綵雜華以象庶物咸遂羽葆四垂以象天無不覆正方布位以象地無不載分四列以象四氣舞爲五字以象五行秉羽翟以象文德節鼓以象號令遠布振以鐸明采詩之義用龜茲等樂以象遠夷悅服鈺鼓則古者振旅獻捷之樂也黃鍾君聲配運爲土明土德常盛黃鍾得乾初九自爲其宮則林鍾四律以正聲應之象大君南面提天統於上乾道明也林鍾得坤初六其位西南西南感至化於下坤體順也太簇得乾九二是爲人統天地正而三才通故次應以太簇三才旣通南呂復以羽聲應之南呂酉西方金也羽北方水也金水悅而應平時以象西戎北狄悅服然後姑洗以角音終之姑故也洗濯也以象南詔背吐蕃歸化洗過

日新臯以五宮異用獨唱殊音復述五均譜分金石之節奏一曰黃鍾宮之宮軍士歌奉聖樂者用之舞人服南詔衣秉翟俯伏拜拊合南詔奉聖樂五字倡詞五舞人乃易南方朝天之服絳色七節襦袖節有青襍排袷以象鳥翼樂用龜茲胡部金鉦擗鼓鏡貝大鼓二曰太簇商之宮女子歌奉聖樂者用之合以管絃若奏庭下則獨舞一曲樂用龜茲鼓笛各四部與胡部等合作琵琶笙篪篥皆八大小箏篋箏五絃琵琶長笛短笛方響各四居龜茲部前次貝一人大鼓十二分左右餘皆坐奏三曰姑洗角之宮應古律林鍾爲徵宮女子歌奉聖樂者用之舞者六十四人飾羅絲襦袖間以八采曳雲花履首飾雙鳳八卦綵雲花鬘執羽爲拜拊之節以林鍾當地統象歲功備萬物成也雙鳳明律呂之和也八卦明遠相爲用也綵雲象氣也花鬘象冠也合奉聖樂三字唱詞三表

遠明板

天下懷聖也小女子字舞則碧色襦袖象角音主木首飾吳卦應姑洗之氣以六人略後象六合一心也樂用龜茲胡部其鉦擗鏡鐸皆覆以綵蓋飾以花趺上陳錦綺垂流蘇按瑞圖曰王者有道則儀鳳在鼓故羽葆鼓棲以鳳凰鉦棲孔雀鏡鐸集以翔鷺鉦擗頂足又飾南方鳥獸明澤及飛走翔伏鉦擗鏡鐸皆二人執擊之貝及大鼓工伎之數與軍士奉聖樂同而加鼓笛四部四曰林鍾徵之宮斂拍單聲奏奉聖樂丈夫一人獨舞樂用龜茲鼓笛每色四人方響二置龜茲部前二隅有金鉦中植金鐸二貝二鈴鏡二大鼓十二分左右五曰南呂羽之宮應古律黃鍾爲君之宮樂用古黃鍾方響一太琵琶五絃琵琶大箏篥倍黃鍾屬篋小箏篋箏笙壘篋擗箏軋箏黃鍾簫笛倍笛節鼓拍板等工皆一人坐奏之絲竹緩作一人獨唱歌工復通唱軍士奉聖樂詞雍羌亦遣弟悉

擗明板
擗下同

利移城主舒難陀獻其國樂至成都韋臯復譜次其聲以其舞容
樂器異常乃圖畫以獻工器二十有二其音八金貝絲竹匏革牙
角金二貝一絲七竹二匏二革二牙一角二鈴鈸四制如龜茲部
周園三寸貫以韋擊磔應節鐵板二長三尺五寸博二寸五分面
平背有柄係以韋與鈴鈸皆飾條紛以花氎縷為藥螺貝四大者
可受一升飾條紛有鳳首筚篥二其一長二尺腹廣七寸鳳首及
項長二尺五寸面飾虺皮絃一十有四項有軫鳳首外向其一頂
有條軫有鼉首箏二其一形如鼉長四尺有四足虛腹以鼉皮飾
背面及仰肩如琴廣七寸腹濶八寸尾長尺餘卷上虛中施關以
張九絃左右一十八柱其一面飾彩花傳以虺皮為別有龍首琵琶
一如龜茲製而項長二尺六寸餘腹廣六寸二龍相向為首有
軫柱各三絃隨其數兩軫在項一在頸其覆形如師子有雲頭琵琶

琵琶一形如前面飾虺皮四面有牙釘以雲為首軫上有花象品字
三絃覆手皆飾虺皮刻捍撥為舞崑崙狀而彩飾之有大匏琴二
覆以半匏皆彩畫之上加銅甌以竹為琴作虺皮橫其上長三尺
餘頭曲如拱長二寸以絛繫腹穿甌及匏本可受二升大絃應太
簇次絃應姑洗有獨絃匏琴以班竹為之不加飾刻木為虺首張
絃無軫以絃繫頂有四柱如龜茲琵琶絃應太簇有小匏琴二形
如大匏琴長二尺大絃應南呂次應應鍾有橫笛二一長尺餘取
其合律去節無爪以蠟實首上加師子頭以牙為之穴六以應黃
鍾商備五音七聲又一管唯加象首律度與荀勗笛譜同又與清
商部鍾聲合有兩頭笛二長二尺八寸中隔一節節左右開衝氣
穴兩端皆分洞體為笛量左端應太簇管末三穴一姑洗二蕤賓
三夷則右端應林鍾管末三穴一南宮二應鍾三大呂下托指一

皮明板

三尺五寸
明板作
三寸五分

穴應清太簇兩洞體七穴共備黃鍾林鍾兩均有大匏笙二皆十
六管左右各八形如鳳翼大管長四尺八寸五分餘管參差相次
製如笙管形亦類鳳翼竹爲簧穿匏達本上古八音皆以木漆代
之用金爲簧無匏音唯驃國得古製又有小匏笙二製如大笙律
應林鍾商有三面鼓二形如酒缸高二尺首廣下銳上博七寸底
博四寸腹廣不過首冒以虺皮束三爲一碧條約之下當地則不
冒四面畫驃國工伎執笙鼓以爲飾有小鼓四製如腰鼓長五寸
首廣三寸五分冒以虺皮牙釘彩飾無柄搖之爲樂節引贊者皆
執之有牙笮穿匏達本漆之上植二象牙代管雙簧皆應姑洗有
三角笮亦穿匏達本漆之上植三牛角一簧應姑洗餘應南呂角
銳在下穿匏達本柄背皆直有兩角笮亦穿匏達本上植二牛角
簧應姑洗匏以彩飾凡曲名十有二一曰佛印驃云沒馱彌國人

及天竺歌以事王也二曰讚娑羅花驃云隴莽第國人以花爲衣
服能淨其身也三曰白鶴驃云答都美其飛止遂情也四曰白鶴
游驃云蘇謾底哩謂翔則摩空行則徐步也五曰鬪羊勝驃云來
乃昔有人見二羊鬪海岸彊者則見弱者入山時人謂之來乃來
乃者勝勢也六曰龍首獨琴驃云彌思彌此一絃而五音備象王
一德以畜萬邦也七曰禪定驃云掣覽詩謂離俗寂靜也七曲唱
舞皆律應黃鍾商八曰甘蔗王驃云遏思略謂佛教民如蔗之甘
皆悅其味也九曰孔雀王驃云桃臺謂毛采光華也十曰野鷺謂
飛止必雙徒侶畢會也十一曰宴樂驃云隴聰網摩謂時康宴會
嘉也十二曰滌煩亦曰笙舞驃云扈那謂時滌煩瞽以此適情也
五曲律應黃鍾兩均一黃鍾商伊越調一林鍾商小植調樂工皆
崑崙衣絳氎朝霞爲蔽膝謂之襪襴兩肩加朝霞絡腋足臂有金

寶環釧冠金冠左右珥瑠條貫花鬢珥雙簪散以毳初秦樂有贊者一人先導樂意其舞容隨曲用人或二或六或四或八至十皆珠冒拜首稽首以終節其樂五譯而至德宗授舒難陀太僕卿遣還開州刺史唐次述驃國獻樂頌以獻太和六年南詔掠其民三千徙之柘東兩爨蠻自曲州靖州西南昆川曲軌晉寧喻獻安寧距龍和城通謂之西爨白蠻自彌鹿升麻二川南至步頭謂之東爨烏蠻西爨自云本安邑人七世祖晉南寧太守中國亂遂王蠻中梁元帝時南寧州刺史徐文盛召詣荊州有爨瓚者據其地延袤二千餘里土多駿馬犀象明珠旣死子震翫分統其衆隋開皇初遣使朝貢命韋世沖以兵戍之置恭州協州昆州未幾叛史萬歲擊之至西洱河滇池而還震翫懼而入朝文帝誅之諸子沒爲奴高祖卽位以其子弘達爲昆州刺史奉父喪歸而益州刺史段

綸遣俞大施至南寧治其範川誘諸部皆納款貢方物太宗遣將擊西爨開青蛉弄棟爲縣爨蠻之西有徒莫祇蠻儉望蠻貞觀二十三年內屬以其地爲傍望覽丘求五州隸郎州都督府白水蠻地與青蛉弄棟接郎州亦隸弄棟西有大勃弄小勃弄二川蠻其西與黃瓜葉榆西洱河接其衆完富與蜀埒無酋長喜相讎怨永徽初大教弄楊承顛私署將帥寇麻州都督任懷玉招之不聽高宗以左領軍將軍趙孝祖爲郎州道行軍總管與懷玉討之至羅仵侯山其酋禿磨蒲與大鬼主都于以衆塞菁口孝祖大破之夷人尚鬼謂主祭者爲鬼主每歲戶出一牛或一羊就其家祭之送鬼迎鬼必有兵因以復仇云孝祖按軍多棄城逐北至周近水大酋儉彌于鬼主董朴瀕水爲柵以輕騎逆戰孝祖擊斬彌于禿磨蒲鬼主十餘級會大雪皸凍死者略盡孝祖上言小勃弄大勃弄

常誘弄棟叛今因破白水請遂西討詔可孝祖軍入夷人皆走險
小勃弄酋長歿盛屯白旗城率萬騎戰敗斬之進至大勃弄楊承
顛嬰城守孝祖招之不從麾軍進執承顛餘屯大者數萬小數千
皆破降之西南夷遂定罷郎州都督更置戎州都督爨弘達既死
以爨歸王爲南寧州都督居石城襲殺東爨首領蓋聘及子蓋啓
徙其範川有兩爨大鬼主崇道者與弟日進日用居安寧城左闡
章仇兼瓊開步頭路築安寧城羣蠻震駭共殺築城使者玄宗詔
蒙歸義討之師次波州歸王及崇道兄弟千餘人泥首謝罪赦之
俄而崇道殺日進及歸王妻阿妣烏蠻女也走父部乞兵相
仇於是諸爨亂阿妣遣使詣歸義求殺夫者書聞詔以其子守隅
爲南寧州都督歸義以女妻之又以一女妻崇道子輔朝然崇道
守隅相攻討不置阿妣訴歸義爲興師營昆川崇道走黎州遂虜
其族殺輔朝收其女崇道俄亦被殺諸爨稍離弱閣羅鳳立召守
隅并妻歸河睽不通中國阿妣自主其部落歲入朝恩賞蕃厚閣
羅鳳遣昆川城使楊牟利以兵脅西爨徙戶二十餘萬於永昌城
東爨以言語不通多散依林谷得不徙自曲靖州石城升麻昆川
南北至龍和皆殘于兵日進等子孫居永昌城烏蠻種復振徙居
西爨故地與峰州爲隣貞元中置都督府領羈縻州十八烏蠻與
南詔世昏姻其種分七部落一曰阿芋路居曲州靖州故地二曰
阿猛三曰夔山四曰暴蠻五曰盧鹿蠻二部落分保竹子嶺六曰
磨彌斂七曰勿鄧土多牛馬無布帛男子鬻髮女人被髮皆衣牛
羊皮俗尚巫鬼無拜跪之節其語四譯乃與中國通大部落有大
鬼主百家則置小鬼主勿鄧地方千里有邛部六姓一姓白蠻也
五姓烏蠻也又有初裏五姓皆烏蠻也居邛部臺登之間婦人衣

黑縉其長曳地又有東欽蠻二姓皆白蠻也居北谷婦人衣白縉長不過膝又有栗蠻二姓雷蠻三姓夢蠻三姓散處黎嶠戎數州之鄙皆隸勿鄧勿鄧南七十里有兩林部落有十低三姓阿屯三姓虧望三姓隸焉其南有豐琵琶部落阿諾二姓隸焉兩林地雖陜而諸部推爲長號都大鬼主勿鄧豐琵琶兩林皆謂之東蠻天寶中皆受封爵及南詔陷嶺州遂羈屬吐蕃貞元中復通款以勿鄧大鬼主苴嵩兼邛部團練使封長川郡公及死子苴驃離幼以苴夢衝爲大鬼主數爲吐蕃侵獵兩林都大鬼主苴那時遺韋臯書乞兵攻吐蕃臯遣將劉朝彩出銅山道吳鳴鶴出清溪關道鄧英俊出定蕃柵道進逼臺登城吐蕃退壁西貢川據高爲營苴那時戰甚力分兵大破吐蕃青海臘城二節度軍於北谷青海大兵馬使乞藏遮遮臘城兵馬使悉多楊朱節度論東柴大將論績突黎等皆戰死執籠官四十五人鎧仗一萬牛馬稱是進拔于葱柵乞藏遮遮尚結贊子也以尸還其下曩貢節度蘇論百餘人行哭使人立尸左一人問之曰瘡痛乎曰然卽傅藥曰食乎曰然卽進膳曰衣乎曰然卽命裘又問歸乎曰然以馬載尸而去詔封苴那時爲順政郡王苴夢衝爲懷化郡王豐琵琶部落大鬼主驃傍爲和義郡王給印章袍帶三王皆入朝宴麟德殿賞資加等歲給其部祿鹽衣綵黎嶠二州吏就賜之以山阻多爲盜侵亾失所賜臯令二州爲築館有賜約酋長自至授賜而遣之然苴夢衝內附吐蕃斷南詔使路臯遣嶺州總管蘇危以兵三百召夢衝至琵琶川聲其罪斬之披其族爲六部以樣棄主之及苴驃離長乃命爲大鬼主驃傍年少驍敢數出兵攻吐蕃吐蕃問道焚其居室部落亾所賜印章臯爲請復得印嬰蠻西有昆明蠻一曰昆彌以西洱河爲境

卽葉榆河也距京師九千里土歌溼宜秔稻人辨首左衽與突厥同隨水草畜牧夏處高山冬入深谷尚戰死惡病亾勝兵數萬武德中巂州治中吉偉使南寧因至其國諭使使朝貢求內屬發兵戍守自是歲與牂柯使偕來龍朔三年矩州刺史謝法成招慰比樓等七千戶內附總章三年置祿州湯望州咸亨三年昆明十四姓率戶二萬內附析其地爲殷州總州敦州以安輯之殷州居戎州西北總州居西南敦州居南遠不過五百餘里近三百里其後又置盤麻等四十一州皆以首領爲刺史昆明東九百里卽牂柯國也兵數出侵地數千里元和八年上表請盡歸牂柯故地開成元年鬼主阿珮內屬會昌中封其別帥爲羅殿王世襲爵其後又封別帥爲滇王皆牂柯蠻也東距辰州二千四百里其南千五百里卽交州也無城郭土熟多霖雨稻粟再熟無徭役戰乃屯聚刻

木爲契盜者倍三而償殺人者出牛馬三十俗與東謝同首領亦姓謝氏至龍羽有兵三萬武德三年遣使者朝以其地爲牂州拜龍羽刺史封夜郎郡公其北百五十里有別部曰兖州蠻勝兵二萬亦來朝貢以地爲兖州開元中牂柯酋長元齊死孫嘉藝襲官封其後乃以趙氏爲酋長二十五年趙君道來朝其裔有趙國珍天寶中戰有功閻羅鳳叛宰相楊國忠兼劔南節度使以國珍有方略授黔中都督屢敗南詔護五溪十餘年天下方亂其部獨寧終工部尚書貞元中官其酋長趙主俗亦以襲朝貢不絕至十八年五遣使朝元和二年詔黔南觀察使常以本道將爲押領牂柯昆明等使自是數遣使或朝正月訖開成不絕故事戎夷朝貢將至都中官驛勞於郊旣及館恩禮尤渥西爨之南有東謝蠻居黔州西三百里南距守宮獠西連夷子地方千里宜五穀爲畬田歲

一易之衆處山巢居汲流以飲無賦稅刻木爲契見貴人執鞭而拜賞有功者以牛馬銅鼓犯小罪則杖大事殺之盜物者倍償昏姻以牛酒爲聘女歸夫家夫慙澀避之旬日乃出會聚擊銅鼓吹角俗椎髻韜以絳垂于後坐必蹲踞常帶刀劔男子服衫襖大口袴以帶斜纏右肩以螺殼虎豹獾犬羊皮爲飾有謝氏世爲酋長部落尊畏之其族不育女自以姓高不可以嫁人貞觀三年其酋元深入朝冠烏熊皮若注旄以金銀絡額被毛帔韋行滕著履中書侍郎顏師古因是上言昔周武王時遠國入朝大史次爲王會篇今蠻夷入朝如元深冠服不同可寫爲王會圖詔可帝以地爲應州卽拜元深刺史隸黔州都督府又有南謝首領謝彊亦來朝以其地爲莊州授彊刺史建中三年大酋長檢校蠻州長史資陽郡公宋鼎與諸謝朝賀德宗以其國小不許訴於黔中觀察使

給作馮族作威

爲王會

王礎以州接牂柯願隨牂柯朝賀礎奏牂蠻二州戶繁力溷爲隣蕃所憚請許三年一朝詔從之元和中辰淑蠻酋張伯靖嫉本道督斂苛刻聚衆叛侵播費二州黔中經略使崔能荆南節度使嚴綬湖南觀察使柳公綽討之三歲不能定伯靖上表請隸荆南乃降崔能內恨之更請調荆南湖南桂管軍爲援約西原十洞兵皆出可以成功公卿議者皆以爲便宰相李吉甫曰伯靖挾怨而叛壓以大兵而招之可不戰自定乃命能兵毋出獨詔嚴綬招伯靖率家屬詣江陵降授右威衛翊府中郎將東謝南有西趙蠻東距夷子西屬昆明南西洱河也山穴阻深莫知道里南北十八日行東西二十三日行戶萬餘俗與東謝同趙氏世爲酋長夷子渠帥姓季氏與西趙皆南蠻別種勝兵各萬人自古未嘗通中國黔州豪帥田康諷之故貞觀中皆遣使入朝西趙首領趙酋摩率所部

萬餘戶內附以其地爲明州授酋摩刺史松外蠻尚數十百部大者五六百戶小者二三百凡數十姓趙楊李董爲貴族皆擅山川不能相君長有城郭文字頗知陰陽歷數自夜郎滇池以西皆莊躡之裔有稻麥粟豆絲麻薤蒜桃李以十二月爲歲首布幅廣七寸正月蠶生二月熟男子氊革爲帔女衣純布裙衫髻盤如髮飯用竹筲搏而噉之烏杯貯羹如雞彝徒跣有舟無車死則坎地殯舍左屋之三年乃葬以蠡蚌封棺父母喪斬衰布衣不緝居喪昏嫁年近者二三年爲人所殺者子以麻括髮墨面衣不緝居喪昏嫁不廢亦弗避同姓壻不親迎富室娶妻納金銀牛羊酒女所齎亦如之有罪者樹一長木擊鼓集衆其下彊盜殺之富者賞死燒屋奪其田盜者倍九而償賊姦淫則彊族輸金銀請和而棄其妻處女釐婦不坐凡相殺必報力不能則其部助攻之祭祀殺牛馬親

聯畢會助以牛酒多至數百人貞觀中雋州都督劉伯英上疏松外諸蠻率蹙附亟叛請擊之西洱河天竺道可通也居數歲太宗以右武侯將軍梁建方發蜀十二州兵進討酋帥雙舍拒戰敗走殺獲十餘萬羣蠻震駭走保山谷建方諭降者七十餘部戶十萬九千署首領蒙和爲縣令餘衆感悅西洱河蠻亦曰河蠻道繇郎州走三千里建方遣奇兵自雋州道千五百里掩之其帥楊盛大駭欲遁去使者好語約降乃遣首領十人納款軍門建方振旅還二十二年西洱河大首領楊同外東洱河大首領楊斂松外首領蒙羽皆入朝授官秩顯慶元年西洱河大首領楊棟附顯和蠻大首領王羅初郎昆梨盤四州大首領王伽衝率部落四千人歸附入朝貢方物其後茂州西南築安戎城絕吐蕃通蠻之道生羌爲吐蕃鄉導攻拔之增兵以守西洱河諸蠻皆臣吐蕃開元中首領

始入朝授刺史會南詔蒙歸義拔大和城乃北徙更羈制於浪穹詔浪穹詔已破又徙雲南柘城黎州領羈縻奉上等州二十六開元十七年又領羈縻夏梁卜貴等州三十一南路有廓清道部落主三人婆鹽鬼主十人又有阿逼蠻分十四部落一曰大龍池二曰小龍池三曰控四曰苴質五曰烏披六曰苴質七曰鬻粟水八曰戎列九曰婆狄十曰石地十一曰羅公十二曰詵十三曰離旻十四曰里漢黎邛二州之東又有凌蠻西有三王蠻蓋祚都夷白馬氏之遺種楊劉郝三姓世爲長襲封王謂之三王部落疊巒而居號綢舍歲稟節度府帛三千匹以訶南詔而南詔亦密賂之覘成都虛實每節度使至酋長來謁節度使多奏威惠所懷以罔天子也前謁必請於都押衙且聽命都押衙不令者輒諷其叛常倚三王部落求姑息至唐末益甚雅州西有通吐蕃道三曰夏陽曰夔松曰始陽皆諸蠻錯居凡部落四十六距州三百餘里之外有百坡當品巖城中川鉗矣昌逼鉗井七部落四百餘里之外有羅巖當馬三井束鋒名耶鉗恭畫重羅林籠羊林波林燒龍逢索古敢川驚川禍眉不燭十七部落五百餘里之外有諾祚三恭布嵐欠馬論川讓川遠南卑盧夔龍曜川金川東嘉梁西嘉梁十三部落六百餘里之外有椎梅作重禍林金林邏蓬五部落皆羈縻州也以首領襲刺史雋州新安城傍有六姓蠻一曰蒙蠻二曰夷蠻三曰訛蠻四曰狼蠻餘勿鄧及白蠻也戎州管內有馴騁浪三州大鬼主董嘉慶累世內附以忠謹稱封歸義郡王貞元中狼蠻亦請內附補首領浪沙爲刺史然卒不出劔南西川節度使韋臯檄嘉慶兼押狼蠻又有魯望等部落徙居戎州馬鞍山臯以其遠邊徼戶給米二斛鹽五斤北又有浪稽蠻羅哥谷蠻東有婆秋蠻烏

皮蠻南有離東蠻鍋鏗蠻西有磨些蠻與南詔越析相姻婭自浪
稽以下古滇王哀牢雜種其地與吐蕃接亦有姐羌古白馬氏之
裔劔山當吐蕃大路屬石門柳彊二鎮置戍守捉以招討使領五
部落一曰彌羌二曰鑠羌三曰胡叢其餘東欽磨些也又有夷望
鼓路西望安樂湯谷佛蠻虧野阿醯阿鶚鉞蠻林井阿異十二鬼
主皆隸雋州又有奉國首伽十一部落春秋受賞於雋州然挾吐
蕃爲輕重每節度使至諸部獻馬酋長衣虎皮餘皆紅髻束髮錦
纈襖半臂旣見請匹錦斗酒折草招父祖魂以歸鄉里及還裹錦
植馬上而去又有顯養東曾諸蠻永徽三年與胡叢皆叛高宗以
右驍衛將軍曹繼叔爲雋州道行軍總管戰斜山拔十餘城斬首
七百獲馬犛牛萬五千姚州境有永昌蠻居古永昌郡地咸亨五
年叛高宗以太子右衛副率梁積壽爲姚州道行軍總管討平之

武后天授中遣御史裴懷古招懷至長壽時大首領董期率部落
一萬內屬其西有撲子蠻趨悍以青娑羅爲通身袴善用竹弓入
林射飛鼠無不中無食器以蕉葉藉之人多長大負排持鞘而鬪
又有望蠻者用木弓短箭鏃傳毒藥中者立死婦人食乳酪肥白
跣足青布爲衫裳聯貫珂貝珠絡之髻垂于後有夫者分兩髻羣
蠻種類多不可記有黑齒金齒銀齒三種見人以漆及鏤金銀飾
齒寢食則去之直頂爲髻青布爲通袴有繡脚種刻踝至腓爲文
有繡面種生踰月涅黛於面有雕題種身面涅黛有穿鼻種以金
環徑尺貫其鼻下垂過頤君長以絲係環人牽乃行其次以二花
頭金釘貫鼻下出又有長髻種棟鋒種皆額前爲長髻下過臍行
以物舉之君長則二女在前共舉其髻乃行安南有生蠻林覩符
部落大曆中置德化州戶一萬又以潘歸國部落置龍武州戶千

五百詔安南節度使綏定之貞元七年始以驩峯二州爲都督府
驩在安南限重海與文單占婆接峯統羈縻州十八與蜀夔蠻接
南平獠東距智州南屬渝州西接南州北涪州戶四千餘多瘴癘
山有毒草沙虱蝮蛇人樓居梯而上名爲干欄婦人橫布二幅穿
中貫其首號曰通裙美髮髻垂於後竹筒三寸斜穿其耳貴者飾
以珠璫俗女多男少婦人任役昏法女先以貨求男貧者無以嫁
則賣爲婢男子左衽露髮徒跣其王姓朱氏號劔荔王貞觀三年
遣使內款以其地隸渝州有飛頭獠者頭欲飛周項有痕如縷妻
子共守之及夜如病頭忽仆比旦還又有烏武獠地多瘴毒中者
不能飲藥故自鑿齒有甯氏世爲南平渠帥陳末以其帥猛力爲
寧趙太守陳亾自以爲與陳叔寶同日而生當代爲天子乃不入
朝隋兵阻瘴不能進猛力死子長真襲刺史及討林邑長真出兵
攻其後又率部落數千從征遼東煬帝召爲鴻臚卿授安撫大使
遣還又以其族人甯宣爲合浦太守隋亂皆以地附蕭銑長真部
越兵攻丘和於交趾者也武德初以寧越鬱林之地降自是交愛
數州始通高祖授長真欽州都督甯宣亦遣使請降未報而卒以
其子純爲廉州刺史族人道明爲南越州刺史六年長真獻大珠
昆州刺史沈遜融州刺史歐陽世普象州刺史秦元覽亦獻筒布
高祖以道遠勞人皆不受道明與高州首領馮暄談殿據南越州
反攻姜州甯純以兵援之八年長真陷封山縣昌州刺史龐孝恭
椅擊暄等走之明年道明爲州人所殺未幾長真死子據襲刺史
馮暄談殿阻兵相掠羣臣請擊之太宗不許遣員外散騎常侍韋
叔諧員外散騎侍郎李公淹持節宣諭暄等與溪洞首領皆降南
方遂定大抵劔南諸獠武德貞觀間數寇暴州縣者不一巴州山

獠王多馨叛梁州都督龐玉臬其首又破餘黨符陽白石二縣獠
其後眉州獠反益州行臺郭行方大破之未幾又破洪雅二州獠
俘男女五千口是歲益州獠亦反都督竇軌請擊之太宗報曰獠
依山險當拊以恩信脅之以兵威豈爲人父母意耶貞觀七年東
西玉洞獠反以右屯衛大將軍張士貴爲龔州道行軍總管平之
十二年巫州獠叛夔州都督齊善行擊破之俘男女三千餘口鈞
州獠叛桂州都督張寶德討平之明州山獠又叛交州都督李道
彥擊走之是歲巴洋集壁四州山獠叛攻巴州遣右武侯將軍上
官懷仁破之于壁州虜男女萬餘明年遂平十四年羅竇諸獠叛
以廣州都督党仁弘爲竇州道行軍總管擊之虜男女七千餘人
太宗再伐高麗爲船劔南諸獠皆半役雅邛眉三州獠不堪其擾
相率叛詔發隴右峽兵二萬以茂州都督張士貴爲雅州道行軍
總管與右衛將軍梁建方平之高宗初琰州獠叛梓州都督謝萬
歲兗州刺史謝法興黔州都督李孟嘗討之萬歲法興入洞招慰
遇害顯慶三年羅竇生獠酋領多胡桑率衆內附上元末納州獠
叛寇故茂都掌二縣殺吏民焚廨舍詔黔州都督發兵擊之大曆
二年桂州山獠叛陷州刺史李良遁去貞元中嘉州綏山縣婆籠
川生獠首領甫枳兄弟誘生蠻爲亂剽居人西川節度使韋臯斬
之招其首領勇于等出降或請增柵東凌界以守臯不從曰無戎
而城害所生也獠亦自是不擾境戎瀘間有葛獠居依山谷林菁
踰數百里俗喜叛州縣撫視不至必合黨數千人持排而戰奉酋
帥爲王號曰婆能出入前後植旗大中末昌瀘二州刺史貪沓以
弱繒及羊彊獠市米麥一斛得直不及半羣獠訴曰當爲賊取死
耳刺史召二小吏榜之曰皆爾屬爲之非吾過獠相視大笑遂叛

立酋長始艾爲王踰梓潼所過焚剽刺史劉成師誘降其黨斬首
領七十餘人餘衆遁至東川節度使柳仲郢諭降之始艾稽首請
罪仲郢貰遣之成都西北二千餘里有附國蓋漢西南夷也其東
部有嘉良夷無姓氏地縱八百里橫西四千里無城柵居川
谷疊石爲巢高十餘丈以高下爲差作狹戶自內以通上王酋帥
以金飾首胸垂金花徑三寸地高涼多風少雨宜小麥多白雉嘉
良夷有水廣三十步附國水廣五十步皆南流以韋爲船附國南
有薄緣夷西接文國三濮者在雲南徼外千五百里有文面濮俗
鑊面以青涅之赤口濮裸身而折齒劉其脣使赤黑燹濮山居如
人以幅布爲裙貫頭而繫之丈夫衣穀皮多白蹄牛虎魄龍朔中
遣使與干支弗磨臘同朝貢

西原蠻居廣容之南邕桂之西有甯氏者相承爲豪又有黃氏居
黃橙洞其隸也其地西接南詔天寶初黃氏彊與韋氏周氏儂氏
相脣齒爲寇害據十餘州韋氏周氏恥不肯附黃氏攻之逐于海
濱至德初首領黃乾曜真崇鬱與陸州武陽朱蘭洞蠻皆叛推武
承斐韋敬簡爲帥僭號中越王廖殿爲桂南王莫淳爲拓南王相
支爲南越王梁奉爲鎮南王羅誠爲戎成王莫濤爲南海王合衆
二十萬縣地數千里署置官吏攻桂管十八州所至焚廬舍掠士
女更四歲不能平乾元初遣中使慰曉諸首領賜詔書赦其罪約
降於是西原環古等州首領方子彈甘令暉羅承韋張九解宋原
五百餘人請出兵討承斐等歲中戰二百斬黃乾曜真鬱崇廖殿
莫淳梁奉羅誠莫濤七人承斐等以餘衆面縛詣桂州降盡釋其
縛差賜布帛縱之其種落張侯夏永與夷獠梁崇牽覃問及西原
酋長吳功曹復合兵內寇陷道州據城五十餘日桂管經略使邢

濟擊平之執吳功曹等餘衆復圍道州刺史元結固守不能下進攻永州陷邵州畱數日而去湖南團練使辛京杲遣將王國良戍武崗嫉京杲貪暴亦叛有衆千人侵掠州縣發使招之且服且叛建中元年城溱州以斷西原國良乃降貞元十年黃洞首領黃少卿者攻邕管圍經略使孫公器請發嶺南兵窮討之德宗不許命中人招諭不從俄陷欽橫潯貴四州少卿子昌沔趨勇前後陷十三州氣益振乃以唐州刺史陽旻爲容管招討經略使引師掩賊一日六七戰皆破之侵地悉復元和初邕州擒其別帥黃承慶明年少卿等歸款拜歸順州刺史弟少高爲有州刺史未幾復叛又有黃少度黃昌瓘二部陷賓巒二州據之十一年攻欽橫二州邕管經略使韋悅破走之取賓巒二州是歲復屠巖州桂管觀察使裴行立輕其軍弱首請發兵盡誅叛者徼幸有功憲宗許之行立兵出擊彌更二歲安奏斬獲二萬罔天子爲解自是邕容兩道無傷疾疫死者十八以上調費鬪亡繇行立陽旻二人當時莫不答之及安南兵亂殺都護李象古擢唐州刺史桂仲武爲都護逗畱不敢進貶安州刺史以行立代之尋召還卒長慶初以容管經略使畱後嚴公素爲經略使復上表請討黃氏兵部侍郎韓愈建言黃賊皆洞獠無城郭依山險各治生業急則屯聚畏死前日邕管經略使德不能綏懷威不能臨制侵詐係縛以致憾恨夷性易動而難安劫州縣復私讎貪小利不爲大患自行立陽旻建征討生事詭賞邕容兩管日以凋弊殺傷疾患十室九空百姓怨嗟如出一口人神共嫉二將繼死今嚴公素非撫御之才復尋往謬誠恐嶺南未有寧時昨合邕容爲一道邕與賊限一江若經略使居之兵鎮所處物力雄完則敵人不敢輕犯容州則隔阻已甚以經略

使居之則邕州兵少情見易啓蠻心請以經略使還邕州容置刺
史便甚又比發南兵遠鄉羈旅疾疫殺傷續添續死每發倍難若
募邕容千人以給行營糧不增而兵便習守則有威攻則有利自
南討損傷嶺南人希賊之所處洞壘荒僻假如盡殺其人得其地
在國計不爲有益容貸羈縻比之禽獸來則捍禦去則不追未有
虧損朝廷願因改元大慶普赦其罪遣郎官御史以天子意丁寧
宣諭必能謹叫聽命爲選材用威信者委以經略處理得方宜無
侵叛事不納初邕管旣廢人不謂宜監察御史杜周士使安南過
邕州刺史李元宗白狀周士從事五管積三十年矣亦知其不便
嚴公素遣人盜其橐周士憤死公素劾元宗擅以羅陽縣還黃少
度元宗懼引兵一百持印章依少度穆宗遣監察御史敬僚按之
僚嘗爲容州從事與公素暱傳致元宗罪以母老流驩州衆以爲
不直黃賊更攻邕州陷左江鎮攻欽州陷千金鎮刺史楊嶼奔石
南柵邕州刺史崔結擊破之明年又寇欽州殺將吏是歲黃昌瓏
遣其黨陳少奇二十人歸款請降敬宗納之黃氏儂氏據州十八
經略使至遣一人詣治所稍不得意輒侵掠諸州橫州當邕江官
道嶺南節度使常以兵五百戍守不能制大和中經略使董昌齡
遣子蘭討平峒穴夷其種黨諸蠻畏服有違命者必嚴罰之十八
州歲輸貢賦道路清平其後儂洞最彊結南詔爲助懿宗與南詔
約和二洞數構敗之邕管節度使辛讜以從事徐雲虔使南詔結
和齎美貨啖二洞首領太州刺史黃伯蘊屯洞首領儂金意員州
首領儂金勒等與之通驩員州又有首領儂金澄儂仲武與金勒
襲黃洞首領黃伯善伯善伏兵灤水雞鳴候其半濟擊殺金澄仲
武唯金勒遁免後欲興兵報仇辛讜遣人持牛酒音樂解和并遣

其毋衣服毋賢者也讓其子曰節度使持物與獠毋非結好也以汝為吾子前日兵敗灤水士卒略盡不自悔復欲動眾兵忿者必敗吾將囚為官老婢矣金勒感悟為罷兵

贊曰唐北禽頡利西滅高昌焉耆東破高麗百濟威制夷狄方策所未有也交州漢之故封其外瀕海諸蠻無廣土堅城可以居守故中國兵未嘗至及唐稍弱西原黃洞繼為邊害垂百餘年及其人也以南詔詩曰惠此中國以綏四方不以夷狄先諸夏也

南蠻列傳第一百四十七下

續

西川通志卷之四十五

唐書二百二十二下

姦臣列傳第一百四十八上

西川通志卷之四十五

唐書二百二十三

許敬宗字延族杭州新城人父善心仕隋為給事中敬宗幼善屬文大業中舉秀才中第調淮陽書佐俄直謁者臺奏通事舍人事善心為宇文化及所殺敬宗哀請得不死去依李密為記室武德初補漣州別駕太宗聞其名召署文學館學士貞觀中除著作郎兼修國史喜謂所親曰仕宦不為著作無以成門戶俄改中書舍人文德皇后喪羣臣衰服率更令歐陽詢貌醜異敬宗侮笑自如貶洪州司馬累轉給事中復修史以勞封高陽縣男檢校黃門侍郎高宗在東宮遷太子右庶子高麗之役太子監國定州敬宗與高士廉典機劇岑文本卒帝驛召敬宗以本官檢校中書侍郎駐蹕山破賊命草詔馬前帝愛其藻警由是專掌誥令初太子承乾廢官屬張玄素令狐德棻趙弘智裴宣機蕭鈞皆除名為民不復

用敬宗爲言玄素等以直言被嫌忌今一槩被罪疑洗宥有所未
至帝悟多所甄復高宗卽位遷禮部尚書敬宗饗沓遂以女嫁蠻
酋馮盎子多私所聘有司劾舉下除鄭州刺史俄復官爲弘文館
學士帝將立武昭儀大臣切諫而敬宗陰揣帝私卽安言曰田舍
子賸穫十斛麥尚欲更故婦天子富有四海立一后謂之不可何
哉帝意遂定王后廢敬宗請削后家官爵廢太子忠而立代王遂
兼太子賓客帝得所欲故詔敬宗待詔武德殿西闥頃拜侍中監
修國史爵郡公帝嘗幸故長安城按蹕裴回視古區處問侍臣秦
漢以來幾君都此敬宗曰秦居咸陽漢惠帝始城之其後苻堅姚
萇宇文周居之帝復問漢武開昆明池實何年對曰元狩三年將
伐昆明實爲此池以肄戰帝乃詔與弘文學士討古宮室故區具
條以聞進中書令仍守侍中敬宗於立后有助力知后鉗戾能固

士以久已權乃陰連后謀逐韓瑗來流褚遂良殺梁王長孫無忌
上官儀朝廷重足事之威寵熾灼當時莫與比以右相辭疾拜太
子少師同東西臺三品年老不任趨步特詔與司空李勣朝朔日
聽乘小馬至內省帝東封泰山以敬宗領使次濮陽帝問竇德玄
此謂帝丘何也德玄不對敬宗僂曰卽能知之昔帝顓頊始居此
地以王天下其後夏后相因之爲寒泚所滅后緡方偃逃出自竇
在此地也後昆吾氏因之而爲夏伯昆吾既衰湯滅之其頌曰韋
顧旣伐昆吾夏桀是也至春秋時衛成公自楚丘徙居之左氏稱
相奪予享以舊地也由顓頊所居故曰帝丘臣聞有德者啓其國
土失道者則喪其疆宇自古大都美國居者不一姓故有國家者
不可不慎也帝曰書稱浮于濟潔今濟與潔斷不相屬何故而然
對曰夏禹導沅水東流爲濟入于河今自潔至溫而入河水自此

狀地過河而南出爲滎又狀而至曹濮散出於地合而東汶水自南入之所謂洑爲滎東出于陶丘北又東會于汶是也古者五行皆有官水官不失職則能辨味與色潛而出合而更分皆能識之帝曰天下洪流巨谷不載祀典濟甚細而在四瀆何哉對曰瀆之言獨也不因餘水獨能赴海者也且天有五星運而爲四時地有五嶽流而爲四瀆人有五事用而爲四支五陽數也四陰數也有奇偶陰陽焉陽者光曜陰者晦昧故辰隱而難見濟潛流屢絕狀雖微細獨而尊也帝曰善敬宗退矜曰大臣不可無學向德玄不能對吾恥之德宗聞之不屑曰人各有能能不彊所不知吾所能也李勣曰敬宗多聞美矣實之不彊不亦善乎初高祖太宗實錄敬播所譔信而詳及敬宗身爲國史竄改不平專出已私始虞世基與善心同遭賊害封德彝常曰昔吾見世基死世南匍匐請代善

心死敬宗蹈舞求生世爲口實敬宗銜憤卒立德彝傳盛誣以惡敬宗子娶尉遲敬德女孫而女嫁錢九隴子九隴本高祖隸奴也爲虛立門閥功狀至與劉文靜等同傳太宗賜長孫無忌威鳳賦敬宗猥稱賜敬德蠻酋龐孝泰率兵從討高麗賊笑其懦襲破之敬宗受其金乃稱屢破賊唐將言驍勇者唯蘇定方與孝泰曹繼叔劉伯英出其下遠甚然自貞觀後論次諸書自晉盡隋及東殿新書西域圖志姓氏錄新禮等數十種皆敬宗總知之賞賚不勝紀敬宗營第舍華僭至造連樓使諸妓走馬其上縱酒奏樂自娛嬖其婢因以繼室假姓虞子昂丞之敬宗怒黜虞奏斥昂嶺外久乃表還咸亨初以特進致仕仍朝朔望續其俸祿卒年八十一帝爲舉哀詔百官哭其第冊贈開府儀同三司揚州大都督陪葬昭陵太常博士袁思古議敬宗棄子荒微女稼蠻落諡曰繆其孫彥

伯訴思古有嫌詔更議博士王福時曰何曾忠而孝以食日萬錢
諡繆醜况敬宗忠孝兩棄飲食男女之累過之執不改有詔尚書
省雜議更諡曰蔡彦伯昂子也頗有文敬宗晚年不復下筆凡大
典冊悉彦伯爲之嘗戲昂曰吾兒不及若兒答曰渠父不如昂父
後又納婢譖奏流彦伯嶺表遇赦還累官太子舍人旣與思古有
憾欲邀擊諸路思古曰吾爲先子報仇耳彦伯慙而止垂拱中詔
敬宗配饗高宗廟廷

李義府瀛州饒陽人其祖嘗爲射洪丞因客永泰貞觀中李大亮
巡察劔南表義府才對策中第補門下省典儀劉洎馬周更薦之
太宗召見轉監察御史詔侍晉王王爲太子除舍人崇賢館直學
士與司議郎來濟俱以文翰顯時稱來李獻承華箴末云佞諛有
類邪巧多方其萌不絕其害必彰義府方諂事太子而文致若謹

直者太子表之優詔賜帛高宗立遷中書舍人兼修國史進弘文
館學士爲長孫无忌所惡奏斥壁州司馬詔未下義府問計於舍
人王德儉德儉者許敬宗甥瘦而智善揣事因曰武昭儀方有寵
上欲立爲后畏宰相議未有以發之君能建白轉禍於福也義府
卽代德儉直夜叩閣上表請廢后立昭儀帝悅召見與語賜珠一
斗停司馬詔書畱復侍武后已立義府與敬宗德儉及御史大夫
崔義玄中丞袁公瑜大理正侯善業相推轂濟其姦誅棄骨體大
臣故后得肆志攘取威柄天子斂衽矣義府貌柔恭與人言嬉怡
微笑而陰賊褊忌著于心凡忤意者皆中傷之時號義府笑中刀
又以柔而害物號曰人貓永徽六年拜中書侍郎同中書門下三
品封廣平縣男又兼太子右庶子爵爲侯洛州女子淳于以姦繫
大理義府聞其美屬丞畢正義出之納以爲妾卿段寶玄以狀聞

詔給事中劉仁軌侍御史張倫鞫治義府且窮逼正義縊獄中以絕始謀侍御史王義方延劾義府不引咎三叱之然後趨出義方極陳其惡帝陰德義府故貸不問爲抑義方逐之未幾進中書令檢校御史大夫加太子賓客更封河間郡公詔造私第諸子雖祿負皆補清官初杜正倫爲黃門侍郎義府纔典儀及同輔政正倫恃先進不相下密與中書侍郎李友益圖去義府反爲所誣交訟帝前帝兩黜之正倫爲橫州刺史義府普州刺史流友益峰州明年召爲吏部尚書同中書門下三品母喪免奪喪爲司列太常伯同東西臺三品更葬其先永康陵側役縣人牛車輪土築墳助役者凡七縣高陵令不勝勞而死公卿爭贈遺葬日詔御史節哭送車從騎相銜帷帟奠帳自灞橋屬三原七十里不絕輜輶芻偶僮侈不法人臣送葬之盛無與比者殷王出閭又兼府長史稍遷右相義府已貴乃言系出趙郡與諸李叙昭穆嗜進者往往尊爲父兄行給事中李崇德引與同譜旣謫普州亟削去義府銜之及復當國傳致其罪使自殺于獄貞觀中高士廉韋挺岑文本令狐德棻修氏族志凡升降天下允其議於是州藏副本以爲長式時許敬宗以不載武后本望義府亦恥先世不見叙更奏刪正委孔志約楊仁卿史玄道呂才等定其書以仕唐官至五品皆昇士流於是兵卒以軍功進者悉入書限更號姓氏錄縉紳共嗤斬之號曰勲格義府奏悉收前志燒絕之自魏太和中定望族七姓子孫迭爲婚姻後雖益衰猶相夸尚義府爲子求婚不得遂奏一切禁止旣主選無品鑿才而谿壑之欲惟賄是利不復銓判人人咨訕又母妻諸子賣官市獄門如沸湯自永徽後御史多制授吏部雖有調注至門下覆不畱義府乃自注御史員外通事舍人有司不敢

御帝嘗從容戒義府曰聞卿兒子女婿撓法多過失朕爲卿掩覆可少勗之義府內倚后揣羣臣無敢白其罪者不虞帝之知乃勃然變色徐曰誰爲陛下道此帝曰何用問我所從得邪義府警然不謝徐引去帝由是不悅會術者杜元紀望義府第有獄氣曰發積錢二千萬可以厭勝義府信之哀索殊急居母喪朔望給告卽羸服與元紀出野馮高窺覘災眚衆疑其有異謀又遣子津召長孫延謂曰吾爲子得一官居五日延拜司津監索謝錢七十萬右金吾倉曹參軍楊行穎白其賊詔司刑太常伯劉祥道與三司雜訊李勣監按有狀詔除名流寓州子率府長史洽千牛備身洋及壻少府主簿柳元貞竝流延州司議郎津流振州朝野至相賀三子及壻尤凶肆旣敗人以爲誅四凶或作河間道元帥劉祥道破銅山大賊李義府露布榜于衢乾封元年大赦獨流人不許還義府憤恚死年五十三自其斥天下憂且復用比死內外乃安上元初赦妻子還洛陽如意中贈義府揚州大都督崔義玄益州大都督王德儉袁公瑜魏相二州刺史各賜實封睿宗立詔停少子湛見李多祚傳

傅游藝衛州汲人載初初由合宮主簿再遷左補闕武后奪政卽上書詭說符瑞勸后當革姓以明受命后說擢給事中閏三月進同鳳閣鸞臺平章事卽拜鸞臺侍郎后乃黜唐稱周廢唐宗廟自稱皇帝賜游藝姓武氏以兄神童爲冬官尚書游藝嘗夢登湛露殿旣寤以語所親有告其謀反者下獄自殺以五品禮葬之初游藝探后旨誣殺宗室復請發六道使後卒用其言萬國俊等旣出天下被其酷游藝起一歲賜袍自青及紫人號四時仕宦然歲中卽敗前古少其比云

李林甫長平肅王叔良曾孫初爲千牛直長舅姜皎愛之開元初遷太子中允源乾曜執政與皎爲姻家而乾曜子絜爲林甫求司門郎中乾曜素薄之曰郎官應得才望哥奴豈郎中材邪哥奴林甫小字也卽授以諭德累擢國子司業宇文融爲御史中丞引與同列稍歷刑吏部侍郎初吏部置長名榜定畱放寧王私謁十人林甫曰願絀一人以示公遂榜其一曰坐王所囑放冬集時武惠妃寵傾後宮子壽王盛王尤愛林甫因中人白妃願護壽王爲萬歲計妃德之侍中裴光廷夫人武三思女嘗私林甫而高力士本出三思家及光廷卒武請力士以林甫代爲相力士未敢發而帝因蕭嵩言自用韓休方具詔武撻語林甫使爲休請休旣相重德林甫而與嵩有隙乃薦林甫有宰相才妃陰助之卽拜黃門侍郎尋爲禮部尚書同中書門下三品再進兵部尚書皇太子鄂王光王被譖帝欲廢之張九齡切諫帝不悅林甫惘然私語中人曰天子家事外人何與邪二十四年帝在東都欲還長安裴耀卿等建言農人場圃未畢須冬可還林甫陽蹇獨在後帝問故對曰臣非疾也願奏事二都本帝王東西宮車駕往幸何所待時假令妨農獨赦所過租賦可也帝大悅卽駕而西始九齡繇文學進守正持重而林甫特以便佞故得大任每嫉九齡陰害之帝欲進朔方節度使牛仙客實封九齡謂林甫封賞待名臣大功邊將一上最可遽議要與公固爭林甫然許及進見九齡極論而林甫抑嘿退又漏其言仙客明日見帝泣且辭帝滋欲賞仙客九齡持不可林甫爲人言天子用人何不可者帝聞善林甫不專也由是益疏薄九齡俄與耀卿俱罷政事專任林甫相仙客矣初三宰相就位二人磬折趨而林甫在中軒驚無少讓喜津津出眉宇間觀者竊言一

鵬挾兩兔少選詔書出耀卿九齡以左右丞相罷林甫嘻笑曰尚左右丞相邪目恚而送乃止公卿爲戰栗於是林甫進兼中書令帝卒用其言殺三子天下寃之大理卿徐嶠妄言大理獄殺氣盛鳥雀不敢棲令刑部斷死歲纔五十八而烏鵲巢獄戶幾至刑措羣臣賀帝而帝推功大臣封林甫晉國公仙客函國公及帝將立太子林甫探帝意數稱道壽王語祕不傳而帝意自屬忠王壽王不得立太子既定林甫恨謀不行且畏禍乃陽善韋堅堅太子妃兄也使任要職將覆其家以搖東宮及構堅獄而太子絕妃自明林甫計黜杜良娣之父有隣與壻柳勣不相中勣浮險欲助林甫乃上有隣變事捕送詔獄賜死逮引裴敦復李邕等皆林甫素忌惡者株連殺之太子亦出良娣爲庶人未幾擿濟陽別駕魏林使誣河西節度使王忠嗣欲擁兵佐太子帝不信然忠嗣猶斥去林

弟明叔

甫數曰太子宜知謀帝曰吾見在內安得與外人相聞此妄耳林甫數危太子未得志一日從容曰古者立儲君必先賢德非有大勲力於宗稷則莫若元子帝久之曰慶王往年獵爲豹傷面甚答曰破面不愈於破國乎帝頗惑曰朕徐思之然太子自以謹孝聞內外無其言故飛語不得入帝無所發其猜林甫善刺上意時帝春秋高聽斷稍怠厭繩檢重接對大臣及得林甫任之不疑林甫善養君欲自是帝深居燕適沈蠱雜席主德衰矣林甫每奏請必先餉遺左右審伺微旨以固恩信至饗夫御婢皆所款厚故天子動靜必具得之性陰密忍誅殺不見喜怒面柔令初若可親旣崖穿深阻卒不可得也公卿不由其門而進必被罪徙附離者雖小人且爲引重同時相若九齡李適之皆遭逐至楊慎矜張瑄盧幼臨柳升等緣坐數百人竝相繼誅以王鉷吉溫羅希奭爲爪牙數

白明叔

與大獄衣冠爲累息適之子雪嘗盛具召賓客畏林甫乃終日無一人往者林甫有堂如偃月號月堂每欲排構大臣卽居之思所以中傷者若喜而出卽其家碎矣子岫爲將作監見權勢熏灼惕然懼常從游後園見輦重者跪涕曰大人居位久枳棘滿前一旦禍至欲比若人可得乎林甫不樂曰勢已然可奈何時帝詔天下士有一藝者得詣闕就選林甫恐士對詔或斥已卽建言士皆草茅未知禁忌徒以狂言亂聖聽請悉委尚書省長官試問使御史中丞監總而無一中程者林甫因賀上以爲野無畱才俄監隴右河西節度使改右相罷節度加累開府儀同三司實封戶三百咸寧太守趙奉璋得林甫隱惡二十條將言之林甫諷御史捕繫奉璋劾妖言抵死者作郎韋子春坐厚善貶帝嘗大陳樂勤政樓旣罷兵部侍郎盧洵接續絕道去帝愛其醞藉稱美之明日林甫召

絢子曰尊府素望上欲任以交廣若憚行且當請老絢懼從之因出爲華州刺史俄授太子員外詹事絢絲是廢於時有以材譽聞者林甫護前皆能得於天子抑遠之故在位恩寵莫比凡御府所貢遠方珍鮮使者傳賜相望帝食有所甘美必賜之嘗詔百僚閱歲貢於尚書省旣而舉貢物悉賜林甫輦致其家從幸華清宮給御馬武士百人女樂二部辭王別墅勝麗甲京師以賜林甫它邸第田園水磴皆便好上腴車馬衣服侈靡尤好聲伎侍姬盈房男女五十人故事宰相皆元功盛德不務權威出入騎從簡寡士庶不甚引避林甫自見結怨者衆憂刺客竊發其出入廣騶騎先驅百步傳呼呵衛金吾爲清道公卿辟易趨走所居重關複壁絡版築石一夕再徙家人亦莫知也或帝不朝羣司要官悉走其門臺省爲空左相陳希烈雖坐府卒無人入謁林甫無學術發言陋鄙

聞者竊笑善苑咸郭慎微使主書記然練文法其用人非諂附者
一以格令持之故小小綱目不甚亂而人憚其威權久之又兼安
西大都護朔方節度使俄兼單于副大都護以朔方副使李獻忠
反讓還節度始厚王鉷爲盡力及鉷敗詔宰相治狀林甫大懼不
敢面鉷獄具署名亦無所申救因以楊國忠代爲御史大夫林甫
薄國忠材辱無所畏又以貴妃故善之及是權益盛貴震天下始
交惡若仇敵然國忠方兼劍南節度使而南蠻入寇林甫因建遣
之鎮欲離間之國忠入辭帝曰處置且訖亟還指日待卿林甫聞
之憂懣是時已屬疾稍侵會帝幸溫湯詔以馬輦從御醫珍膳繼
至詔旨存問中官護起居病劇巫者視疾云見天子當少間帝欲
視之左右諫止乃詔林甫出廷中帝登降聖閣舉絳巾招之林甫
不能興左右代拜俄而國忠至自蜀謁林甫牀下垂涕託後事因
不食卒諸子護還京發喪贈太尉揚州大都督林甫居相位凡十
九年固寵市權蔽欺天子耳目諫官皆持祿養資無敢正言者補
闕杜璡再上書言政事斥爲下邳令因以語動其餘曰明主在上
羣臣將順不暇亦何所論君等獨不見立仗馬乎終日無聲而飢
三品芻豆一鳴則黜之矣後雖欲不鳴得乎由是諫爭路絕貞觀
以來任蕃將者如阿史那社尒契苾何力皆以忠力奮然猶不爲
上將皆大臣總制之故上有餘權以制於下先天開元中大臣若
薛訥郭元振張嘉貞王駿張說蕭嵩杜暹李適之等自節度使入
相天子林甫疾儒臣以方略積邊勞且大任欲杜其本以久已權
卽說帝曰以陛下雄材國家富彊而夷狄未滅者繇文吏爲將憚
矢石不身先不如用蕃將彼生而雄養馬上長行陣天性然也若
陛下感而用之使必死夷狄不足圖也帝然之因以安思順代林

甫領節度而擢安祿山高仙芝哥舒翰等專爲大將林甫利其虜也無入相之資故祿山得專三道勁兵處十四年不徙天子安林甫策不疑也卒稱兵蕩覆天下王室遂微初林甫夢人髻而髯將逼已寤而物色得裴寬類所夢曰寬欲代我因李適之黨逐之其後楊國忠代林甫貌類寬云國忠素銜林甫及未葬陰誣祿山暴其短祿山使阿布思降將入朝告林甫與思約爲父子有異謀事下有司其壻楊齊宣懼妄言林甫狀祝上國忠劾其姦帝怒詔林甫淫祀厭勝結叛虜圖危宗社悉奪官爵斷棺剔取含珠金紫更以小樽用庶人禮葬之諸子司儲郎中粵太常少卿嶼及岫等悉徙嶺南黔中各給奴婢三人籍其家諸壻若張博濟鄭平杜位元馮屬子復道光皆貶官博濟亦儉薄自肆爲戶部郎中部有考堂天下歲會計處博濟廢爲員外郎中聽事壯幃華敞供擬豐侈至千品別取都水監地爲考堂擅費諸州籍帳錢不貲有司不敢言帝之幸蜀也給事中裴士淹以辯學得幸時肅宗在鳳翔每命宰相輒啓聞及房琯爲將帝曰此非破賊才也若姚元崇在賊不足滅至宋璟曰彼賣直以取名耳因歷評十餘人皆當至林甫曰是子妒賢嫉能舉無比者士淹因曰陛下誠知之何任之久邪帝默不應至德中兩京平大赦唯祿山支黨及林甫楊國忠王鉞子孫不原天寶時嘗鏤玉爲玄宗皇帝及玄宗肅宗像於太清宮復琢林甫陳希烈像列左右序代宗時或言林甫陰險嘗不利先帝宗廟幾危奈何畱像至今有詔瘞宮中廣明初盧攜爲太清宮使發地得其像輦送京兆毀之云

陳希烈者宋州人博學尤深黃老工文章開元中帝儲思經義自褚無量元行沖卒而希烈與康子元馮朝隱進講禁中其應答詔

祝明

問敷盡微隱皆希烈爲之章句累遷中書舍人十九年爲集賢院
學士進工部侍郎知院事帝有所譔述希烈必助成之遷門下侍
郎天寶元年有神降丹鳳門以爲老子告錫靈符希烈因是上言
臣侍演南華真經至七篇陛下願曰此言養生朕旣悟其術而德
充符詎無非常應哉臣稽首對陛下德充於內符應於外必有絕
瑞表之今靈符降錫與帝意合宜示史官著顯祥摛照無窮其媿
佞類如此俄兼崇玄館大學士封臨穎侯林甫顯朝苟用可專制
者引與共政以希烈柔易且帝眷之厚乃薦之五載進同中書門
下平章事遷左丞相兼兵部尚書許國公又兼祕書省圖書使寵
與林甫侔林甫居位久其陰詭雖足自固亦希烈左右焉楊國忠
執政素忌之希烈引避國忠卽薦韋見素代相罷爲太子太師希
烈失職內忽忽無所賴及祿山盜京師遂與達奚珣等偕相賊後
罪當斬肅宗以上皇素所遇賜死于家

姦臣列傳第一百四十八上

西川屯鳳蘭
氏蘭蘭蘭

唐書二百二十三上

姦臣列傳第一百四十八下

西川屯鳳蘭
氏蘭蘭蘭

唐書二百二十三下

盧杞字子良父奔見忠義傳杞有口才體陋甚鬼貌藍色不恥惡
 衣菲食人未悟其不情咸謂有祖風節藉蔭為清道率府兵曹參
 軍僕固懷恩辟朔方府掌書記病免補鴻臚丞出為忠州刺史上
 謁節度府衙伯玉伯玉不喜乃謝歸稍遷吏部郎中為虢州刺史
 奏言虢有官豕三千為民患德宗曰徙之沙苑杞曰同州亦陛下
 百姓臣謂食之便帝曰守虢而憂它州宰相材也詔以豕賜貧民
 遂有意柄任矣俄召為御史中丞論奏無不合踰年遷大夫不閱
 旬擢門下侍郎同中書門下平章事既得志險賊寢露賢者媚能
 者忌小忤已不傅死地不止將大樹威脅眾市權為自固者楊炎
 與杞俱輔政炎鄙杞才下不悅未半歲譖罷炎時大理卿嚴郢與
 炎有隙即擢郢御史大夫以自助炎卒逐死張鎰林裕忠懿帝所

倚愛未有以間會隴右用兵杞乃見帝僞請行帝不可卽薦鎰守鳳翔旣又惡郢時幽州朱滔與泚有違言誣其軍司馬蔡廷玉間闕請殺之俄而滔反帝欲斥之以悅滔下御史鄭詹按狀貶柳州司戶參軍敕吏護送廷玉疑送滔所因自沈于河杞奏恐泚疑爲詔所殺願下詹三司繼治并劾大夫郢初詹善張鎰每伺杞間獨詣鎰杞知之它日伺詹來卽徑至鎰便坐詹趨避杞遽及機事鎰不得已曰鄭侍御在杞陽驚曰向所言非外所得聞至是并按有詔詹杖死流郢費州杜佑判度支帝尤寵禮杞短毀百緒訖貶蘇州刺史李希烈反杞素惡顏真卿挺正敢言卽令宣慰其軍卒爲賊害故宰相李揆有雅望畏復用遣爲吐蕃會盟使卒于行李洧以徐州降有所經略使人誤先白鎰杞怒沮解之不使有功其狙害隱毒天下無不痛憤以杞得君故不敢言是時兵屯河南北拏

不解財用日急於是度支條軍所仰給月費緡百餘萬而藏錢纔支三月杞乃以戶部侍郎趙贊判度支其黨韋都寶等建言商賈儲錢千萬聽自業過千萬者貲其贏以濟軍軍罷約取償于官帝許之京兆暴責其期校吏頸大搜廛里疑占列不盡則笞掠之人不勝冤自殞溝瀆者相望京師囂然不闕日然悉田宅奴婢之直緡止八十萬又僦匱質舍居賀粟者四貲其一僅至二百萬而長安爲閉肆民皆邀宰相祈訴杞無以諭驅而去帝知民愁忿而所得不足給師罷之贊術窮於是間架除陌之暴縱矣其法屋二架爲間差稅之上者二千中千下五百吏執籌入第室計之隱不盡率二架抵罪告者以錢五萬畀之凡公私賀易舊法率千錢算二十請加五十主僧注所售人其算有司其自相市爲私籍自言隱不盡率千錢沒二萬告者以萬錢畀之由是主僧得操其私以爲

姦公上所入常不得半而恨誹之聲滿天下及涇師亂呼於市曰不奪而商人僦質矣不稅而間架除陌矣其倡和造作以召怨挺亂皆杞爲之帝出奉天杞與關播從後數日崔寧自賊中來以播遷事指杞杞卽誣寧反帝殺之靈武杜希全率鹽夏二州士六千來赴帝議所從道杞請道漠谷瑋城曰不然彼多險且爲賊乘不如道乾陵北踰雞子堆而屯與爲犄角賊可破矣帝從杞議賊果拒隘兵不得入奔還邠州李懷光自河北還數破賊泚解去或謂王翊趙贊曰聞懷光嘗斥宰相不能謀度支賦斂重而京兆刻損軍賜宜誅之以謝天下方懷光有功上必聽用其言公等殆矣二人以白杞杞懼卽譎帝曰懷光勲在宗社賊憚之破膽今因其威可一舉而定若許來朝則犒賜畱連賊得裒整殘餘爲完守計圖之實難不如席勝使平京師破竹之勢也帝然之詔懷光無朝進屯便橋懷光自以千里勤難有大功爲姦臣沮間不一見天子內怏怏無所發遂謀反因暴言杞等罪惡士議譁沸皆指目杞帝始寤貶爲新州司馬始帝卽位以崔祐甫爲相專以道德導主意故建中初綱紀張設赫然而貞觀風及杞相乃諷帝以刑名繩天下亂敗踵及其陰害矯譎雖國屯主辱猶警然肆爲之後雖斥然帝念之不衰及興元赦令俄徙吉州長史杞乃曰上必復用我貞元元年詔拜饒州刺史給事中袁高當行詔書不肯草白宰相曰杞反易天常使萬乘播遷幸赦不誅又委大州失天下望宰相不悅乃召它舍人作制高固執不得下於是諫臣趙霽裴佶宇文炫盧景亮張薦等衆對極言杞罪四海共棄今復用之忠臣寒膺良士痛骨必且階禍其言懇到帝語宰相曰授杞小州可乎李勉曰陛下與大州亦無難如四方之謗何乃詔爲澧州別駕後散騎常侍

李泌見帝曰高等論祀事朕可之矣泌頓首賀曰比日外謂陛下漢之桓靈今乃知堯舜主也帝喜祀遂死澧州初尚父郭子儀病甚百官造省不屏姬侍及祀至則屏之隱几而待家人怪問其故子儀曰彼外陋內險左右見必笑使後得權吾族無類矣

崔胤字垂休宰相慎由子也擢進士第累遷中書舍人御史中丞喜陰計附離權彊其外自處若簡重而中險譎可畏崔昭緯屢薦之由戶部侍郎同中書門下平章事方王珙兄弟爭河中以胤爲節度使不得赴半歲復以中書侍郎留輔政及昭緯以罪誅罷爲武安節度使陸扈當國時王室不競南北司各樹黨結藩鎮內相凌脅胤素厚朱全忠委心結之全忠爲言胤有功不宜處外故還相而逐扈光化初昭宗全自華務安反側而胤陰爲全忠地俾擅兵四討帝醜其行罷爲史部尚書復倚扈以相會清海無帥因拜

胤清海節度使始昭緯死皆王搏等白發其姦胤坐是賜罷內銜憾旣與搏同宰相胤議悉去中官搏不助請徐圖之及是不欲外除卽漏其語於全忠令露劾搏交敕使其危國罪當誅胤次湖南召還守司空門下侍郎平章事兼領度支鹽鐵戶部使而賜搏死并誅中尉宋道弼景務修繇是權震天下雖宦官亦累息至是四拜宰相世謂崔四人劉季述幽帝東內奉德王監國畏全忠彊雖深怨胤不敢殺止罷政事胤趣全忠以師西問所以幽帝狀全忠乃使張存敬攻河中掠晉絳神策軍大將孫德昭常忿閹尹廢辱天子胤令判官石戩與游乘間伺察德昭飲酣必泣胤揣得其情乃使戩說曰自季述廢天子天下之人未嘗忘武夫義臣搏手憤惋今謀反者特季述仲先耳它人劫於威無與也君能乘此誅二豎復天子取功名乎卽不早計將有先之者德昭感寤乃告以胤

謀德昭許諾胤斬帶爲誓俄而季述仲先誅以功進司徒不就復
輔政并還使領帝德之延見或不名以字呼之寵遇無比天復元
年全忠已取河中進逼同華中尉韓全誨以胤與全忠善恐導之
翦除君側乃白罷政事未及免倉卒挾帝幸鳳翔胤怨帝見廢不
肯從召全忠以兵迎天子令太子太師盧渥率羣臣迎全忠始全
忠至華遣幕府裴鑄奏事帝不得已聽來朝至是胤爲之謀乃以
兵迫行在帝下詔趣還鎮因詔遣渥等俱西全忠上表具言向書
詔皆出宰相乃今知非陛下意爲所誑誤師業人關請得與李茂
貞約釋憾以迎乘輿茂貞劾奏胤畜死士用度支使權利令親信
陳班與京兆府募兵保所居坊天子出次遣使者五輩往召安卧
不動一奉表陳謝時帝見全忠表亦大恚因下詔顯責之以工部
尚書罷知政事胤出居華州初天復後宦官尤屈事胤事無不咨
每議政禁中至繼以燭請盡誅中官以宮人掌內司事韓全誨等
密知之共於帝前求哀乃詔胤後當密封無口陳中官益恐滋欲
得其謀乃求知書美人宗柔等內左右以刺陰事胤計稍露宦者
或相泣無慘不自安劫幸之謀固矣居華時爲全忠數畫醜計全
忠引兵還屯河中胤迎謁渭橋奉觴爲全忠壽自歌以醕酒會茂
貞殺全誨等與全忠約和帝急召之墨詔者四朱札三皆辭疾及
帝出鳳翔幸全忠軍乃迎謁於道復拜平章事進位司徒兼判六
軍諸衛事詔徙家舍右軍賜帷帳器用十車胤遂奏高祖太宗無
內侍典軍天寶後宦人寢盛德宗分羽林衛爲左右神策軍令宦
者主之以二千人爲率其後參掌機密至內務百司悉歸中人其
相彌縫爲不法朝廷微弱禍始于此請罷左右神策內諸司使諸
道監軍於是中外宦官悉誅天子傳導詔命祇用宮人寵顏等帝

之在鳳翔以盧光啓蘇檢爲相胤皆逐殺之分斥從幸近臣陸扆等三十餘人惟裴贄孤立可制畱與偕秉政帝動靜一決於胤無敢言者胤議以皇子爲元帥全忠副之示褒崇其功全忠內利輝王冲幼故胤藉以請帝曰濮王長若何還禁中召翰林學士韓偓以謀偓陰佐胤卒不能卻全忠還東到長樂羣臣班辭胤獨至霸橋置酒乙夜乃還帝卽召問全忠安否與飲命宮人爲舞劍曲夜夜乃出賜二宮人固讓乃許是時天子孤危威令盡去胤之劫持類如此進侍中魏國公自鳳翔還揣全忠將篡奪顧已宰相恐一日及禍欲握兵自固謬謂全忠曰京師迫茂貞不可無備須募軍以守今左右龍武羽林神策播幸之餘無見兵請軍置四步將將二百五十人一騎將將百人使番休遞侍以京兆尹鄭元規爲六軍諸衛副使陳班爲威遠軍使募卒於市全忠知其意陽相然許胤乃毀浮圖取銅鐵爲兵仗全忠陰令汴人數百應募以其子友倫入宿衛會爲毬戲墜馬死全忠疑胤陰計大怒時傳胤將挾帝幸荆襄而全忠方謀脅乘輿都洛懼其異議密表胤專權亂國請誅之卽罷爲太子少傅全忠令其子友諒以兵圍開化坊第殺胤汴士皆突出市人爭投瓦礫擊其尸年五十一元規陳班等皆死實天復四年正月胤罷凡三日死死十日全忠脅帝遷洛發長安居人悉東徹屋木自渭循河下老幼係路啼號不絕皆大罵曰國賊崔胤導全忠賣社稷使我及此先是全忠雖據河南顧彊諸侯相持未敢決移國及胤間內隙與相結得梯其禍取朝權以成彊大終亾天下胤身屠宗滅世言慎由晚無子遇異浮屠以術求乃生胤字緇郎及爲相其季父安潛喑曰吾父兄刻苦以持門戶終爲緇郎壞之

崔昭緯字蘊曜其先清河人及進士第至昭宗時仕浸顯以戶部侍郎同中書門下平章事居位凡八年累進尚書右僕射性險刻密結中人外連疆諸侯內制天子以固其權令族人鋌事王行瑜邠寧幕府每它宰相建議或詔令有不便於已必使鋌密告行瑜使上書訾訐已則陰阿助之方是時帝室微人主若贅旒然始帝委杜讓能調兵食以討鳳翔昭緯方倚李茂貞行瑜爲重陰得其計則走告之激使稱兵向闕遂殺讓能後又導三鎮兵殺韋昭度等帝性剛明不堪忍會誅行瑜乃罷昭緯爲右僕射復請朱全忠薦已又厚賂諸王爲所奏貶梧州司馬下詔條其五罪賜死行次江陵使者至斬之鋌亦誅

柳璨字炤之公綽族孫也爲人鄙野其家不以諸柳齒少孤貧好學晝採薪給費夜然葉照書彊記多所通涉譏訶劉子玄史通著

析微持或稱之顏蕘判史館引爲直學士由是益知名遷左拾遺昭宗好文待李磎最厚磎死內常求似磎者或薦璨才高試文帝稱善擢翰林學士崔胤死昭宗密許璨宰相外無知者日暮自禁中出騶士傳呼宰相人皆大驚明日帝謂學士承旨張文蔚曰璨材可用今擢爲相應授何官對曰用賢不計資帝曰諫議大夫可乎曰唯唯遂以諫議大夫同中書門下平章事起布衣至是不四歲其暴貴近世所未有裴樞獨孤損崔遠皆宿望舊臣與同位頗輕之璨內以爲怨朱全忠圖篡殺宿衛士皆汴人璨一厚結之與蔣玄暉張廷範尤相得旣挾全忠故朝權皆歸之進中書侍郎判戶部封河東縣男天祐二年長星出太微文昌間占者曰君臣皆不利宜多殺以塞天變玄暉廷範乃與璨謀殺大臣宿有望者璨手疏所仇媚若獨孤損等三十餘人皆誅死天下以爲寃全忠聞

之不善也其後急於九錫宜徵北院使王殷者構璨等言其有貳
故禮不至玄暉懼自往辨解全忠怒罵曰爾與柳璨輩沮我不由
九錫作天子不得邪璨懼即脅哀帝曰人望歸元帥矣陛下宜揖
讓以授終璨請自行進拜司空爲冊禮使即日進道及玄暉死而
全忠恚璨背已貶登州刺史俄除名爲民流崖州尋斬之臨刑悔
叱曰負國賊柳璨死宜矣弟瑀瑊皆榜死

玄暉者少賤不得其系著事朱全忠爲腹心昭宗東遷玄暉爲樞
密使帝駐陝州術家言星緯不常且有天變宜須東幸洛帝度全
忠必篡命衛官高瓌持帛詔賜王建告以脅遷且言全忠以兵二
萬治洛陽將盡去我左右君宜與茂貞克用行密同盟傳檄襄魏
幽鎮使各以軍迎我還京師又詔全忠后方娠須十月乃東全忠
知帝有謀遣寇彥卿趨迫天子不得已遂行抵穀水全忠盡殺左

右黃門內園小兒五百人悉以汴兵爲衛初全忠至鳳翔侵邠州
節度使楊崇本降質其家崇本妻美全忠與亂故崇本怒至是遣
使者會克用茂貞南告趙匡凝及建同舉兵問劫遷狀全忠大懼
帝自出關畏不測常默坐流涕玄暉與張廷範內訓必以告全忠
全忠恨帝無傳禪意乃謀弑以絕人望因令其屬李振諭玄暉玄
暉與龍武統軍朱友恭氏叔琮夜選勇士百人叩行在言有急奏
請見帝宮門開門留十士以守至椒蘭院中夫人裴貞一啓關殺
之乃趨殿下玄暉曰上安在昭儀李漸榮曰院使毋傷宅家寧殺
我士持劍入帝聞遽單衣走環柱遂弑之漸榮以身蔽帝亦死復
執后后求哀玄暉以全忠所弑者帝也乃釋后明日宰相請對日
晏不出玄暉矯遺詔言帝夜與昭儀博爲貞一漸榮所弑出二人
首全忠自河中來朝振曰晉文帝殺高貴鄉公歸罪成濟今宜誅

友恭等解天下謗全忠趨西內臨對嗣天子自言弒逆非本謀皆友恭等罪因泣下請討罪人是時洛城旱米斗直錢六百軍有掠糴者都人怨故因以悅衆執友恭叔琮斬之全忠邀九錫玄暉自持詔趨汴言之還洛不淹日全忠矯詔收付有司車裂之既爲兇逆百姓焚尸都門外廷範者以優人爲全忠所愛扈東遷爲御營使進金吾衛將軍河南尹全忠欲以爲太常卿宰相裴樞持不可絲是樞罷去柳璨希旨下詔責中外不得妄言流品清濁卒用廷範太常卿會天子將郊以爲修樂縣使又與蘇楷等駁昭宗諡全忠患九錫緩也王殷譖其與璨等祀天郊延唐祚及玄暉死璨誅卽貶廷範萊州司戶叅軍輟于河南市叔琮亦汴州人中和末隸感化軍以騎士奮性沈壯有膽力從全忠擊黃巢陳許間名右諸將得爲親校與時浦朱宣戰以多累表檢校尚書右僕射爲宿州

浦原批作溥

刺史攻趙匡凝於襄陽不克又與李克用戰洹水遷曹州刺史天復初拔澤潞擊太原授晉慈觀察使全忠屯鳳翔克用襲絳州攻臨汾叔琮以二壯士類沙陀者牧馬于原與克用軍偕行伺隙各禽一虜還克用大驚疑有伏遂退屯蒲會朱友寧以兵三萬來援叔琮曰賊遁矣無以立功乃潛師夜獵游騎殺數百進破其壘俘斬萬級收馬三千遂長驅取汾州轉戰薄太原而還遷檢校司空再進爲保大軍節度使全忠欲遷帝於洛表爲右龍武統軍與弒帝故全忠請貶白州司戶叅軍斬之叔琮將死呼曰朱溫賣我以取容天下神理謂何友恭者本李彥威也壽州人客汴州殖財任俠全忠愛而子畜之領長劍都積功表爲檢校尚書左僕射乾寧中授汝州刺史檢校司空楊行密侵鄂州友恭將兵萬餘援杜洪至江州還攻黃州人之獲行密將俘斬萬計又襲安州殺守將遷

潁州刺史感化軍節度留後帝東遷爲左龍武統軍貶崖州司戶
參軍臨刑曰溫殺我當亦滅族又語張廷範曰公行及此云
贊曰木將壞蟲實生之國將亾妖實產之故三宰嘯凶牝奪辰林
甫將蕃黃屋奔鬼質敗謀興元蹙崔桺倒持李宗覆嗚呼有國家
者可不戒哉

叛臣列傳第一百四十八下

西川忠貞堂
氏書

唐書一百二十三下

叛臣列傳第一百四十九上

西川忠貞堂
氏書

唐書一百二十四上

僕固懷恩鐵勒部人貞觀二十年鐵勒九姓大首領率衆降分置
瀚海燕然金微幽陵等九都督府別爲蕃州以僕骨歌濫拔延爲
右武衛大將軍金微都督訛爲僕固氏生乙李啜乙李啜生懷恩
世襲都督懷恩善戰鬪曉識戎情部分謹嚴安祿山反從朔方節
度使郭子儀討賊雲中破之敗薛忠義于背度山殺七千騎禽忠
義子下馬邑進會李光弼戰常山趙郡沙河嘉山走史思明肅宗
卽位與子儀赴靈武時同羅部落叛祿山北掠朔方子儀率懷恩
迎擊懷恩子玢戰敗降虜已而自拔歸懷恩怒叱斬之將士股栗
皆殊死戰遂破其衆收馬橐它器械甚衆帝又詔與燉煌王承家
使回紇請師回紇聽命至德二載從子儀下馮翊河東走賊將崔
乾祐襲潼關破之賊將安守忠李歸仁苦戰二日王師敗績懷恩

至渭水無舟抱馬鬣以逸取散卒還河東子儀赴鳳翔歸仁以
兵邀戰三原子儀使懷恩與王升陳回光渾釋之李國貞五將軍
伏白渠下賊至遇伏敗而走又戰清渠不利引還時回紇使葉護
帝得以四千騎濟師南蠻大食等兵亦踵至帝乃詔廣平王爲元
帥使懷恩統回紇兵從王戰香積寺北賊以一軍伏營左懷恩馳
掩之賊斬無遺者賊氣沮既合戰以回紇夾攻賊戰酣脫甲援矛
直擣陣殺十餘人衆驚靡亦會李嗣業鏖鬪尤力賊大崩敗會日
暮懷恩見王曰賊必棄城走願假壯騎二百縛安守忠李歸仁等
致麾下王曰將軍戰疲且休矣迨明與將軍圖之對曰守忠等皆
天下驍賊驟勝而敗此天與我也奈何縱之使復得衆必爲我患
雖悔無逮王不從回請通夕四五反遲明謀者至守忠等果遁去
又從王破賊於新店以復兩京有殊功詔加開府儀同三司鴻臚

卿封豐國公賜封二百戶從郭子儀破安太清下懷衛一州攻相
州戰愁思岡常爲先鋒勇冠軍中乾元二年拜朔方行營節度使
進封太寧郡王懷恩爲人雄重寡言應對舒緩然剛決犯上始居
偏裨意有不合雖主將必折詎其麾下皆蕃漢勁卒恃功多不法
子儀政寬能優容之及李光弼代子儀懷恩仍爲副光弼守河陽
攻懷州降安太清又子瑒亦善鬪以儀同三司將兵每深入多殺
賊憚其勇號猛將太清妻有色瑒劫致于幕光弼命歸之不聽以
卒環守復馳騎趨之射殺七人奪妻還太清懷恩怒曰公乃爲賊
殺官卒邪光弼持法嚴少假貸初會軍汜水朔方將張用濟後乃
斬燾下懷恩心慚光弼自用濟誅常邑邑不樂及光弼與史思明
戰邙山不用令以覆王師帝思其功召入爲工部尚書寵以殊禮
代宗立拜隴右節度使未行改朔方行營節度以副子儀初肅宗

以寧國公主下嫁毗伽闕可汗又爲少子請婚故以懷恩女妻之
少子立號登里可汗而懷恩女爲可敦寶應元年帝召兵於回紇
而登里可汗已爲史朝義所誘引衆十萬盜塞關中大震帝遣殿
中監藥子昂勞之可汗因請見懷恩及其母有詔報可懷恩避嫌
不往帝賜鐵券手詔固遣乃行與可汗會太原可汗大悅遂請和
助討朝義卽引兵屯陝州待師期於是雍王以元帥爲中軍拜懷
恩同中書門下平章事爲之副乃與左殺爲先鋒時諸節度皆以
兵會次黃水賊堅壁自固懷恩陣西原多張旗旛使突騎與回紇
稍南出繚賊左舉旗爲應破賊壁死者數萬朝義擁精騎十萬來
援埋根決戰短兵接殺獲相當魚朝恩令射生五百攢矢注射賊
多死而陣堅不可犯馬璘怒單騎拔旗直進奪兩盾賊辟易大軍
乘以人衆囂不止朝義敗斬首萬六千級禽四千餘人降者二萬

轉戰石榴園老子祠賊再敗自相蹂躪死填尚書合幾滿朝義輕
騎走懷恩進收東都河陽封府庫無所私釋賊所署許叔冀王仙
等衆皆按堵留回紇屯河陽使瑒及北廷兵馬將高輔成以萬騎
逐北懷恩常壓賊而次至鄭州再戰再捷賊帥張獻誠以汴州降
下滑州朝義至衛州與其黨田承嗣李進超李達盧合有衆四萬
據河以戰場濟師登岸薄之賊黨奔潰進次昌樂朝義逸僞師達
盧降薛嵩李寶臣舉相衛深定等九州獻款朝義至貝州與其黨
薛忠義引衆二萬拒瑒於臨清賊氣盛瑒勒兵挫其鋒令高彥崇
渾日進李光逸設三伏以待賊半度伏發擊之朝義走會回紇以
輕騎至瑒卷甲馳之大戰下博賊背水陣師奔擊賊大崩積尸蔽
流而下朝義退守莫州於是都知兵馬使薛兼訓郝廷玉充鄆節
度使辛雲京會師城下朝義與田承嗣數挑戰不勝臨陣斬僞黨

敬榮朝義懼率殘眾奔幽州王師追躡朝義走平州自經死河北
平懷恩與諸將皆罷兵以功遷尚書左僕射兼中書令河北副元
帥朔方節度使加封戶四百初帝有詔但取朝義其它一切赦之
故薛嵩張忠志李懷仙田承嗣見懷恩皆叩頭願效力行伍懷恩
自見功高且賊平則勢輕不能固寵乃悉請裂河北分大鎮以授
之潛結其心以爲助嵩等卒據以爲患云未幾加太子少師增戶
五百第一區與一子五品官詔護回紇歸國道太原辛雲京內忌
懷恩又以其與回紇親疑可汗見襲閉關不敢犒軍懷恩既父子
新立功舉河朔若拾遺各出諸將遠甚而爲雲京所拒大怒表上
其狀頓軍汾州使裨將李光逸以兵守邠李懷光拒晉州張如岳
據沁州高暉等十餘人自從會監軍駱奉先自雲京所歸雲京已
厚結其權因言懷恩與可汗約反狀明白奉先過懷恩升堂拜母

母讓曰若與我兒約兄弟今何自親雲京然前事勿論自今宜如
初酒酣懷恩舞奉先厚納以幣懷恩未及酬奉先亟辭去懷恩卽
遣左右匿其馬奉先疑圖已乘夜遁歸懷恩驚追與其馬奉先還
具奏懷恩反狀懷恩亦請誅雲京奉先詔兩解之懷恩之過潞李
抱玉贈以幣馬懷恩答之俄抱玉表懷恩私有所結廣德初進拜
太保與一子三品一子四品官增封戶五百賜與一子五品官封
戶百仍賜鐵券以名藏太廟畫像凌煙閣又以瑒檢校兵部尚書
朔方行營節度使然懷恩怏怏又性彊固不肯爲讒毀屈無以自
解乃上書陳情曰臣世本夷人少蒙上皇驅策祿山之亂臣以偏
裨決死靜難仗天威神克滅彊胡思明繼逆先帝委臣以兵誓雪
國讎攻城野戰身先士卒兄弟死於陣子姓沒於軍九族之內十
不一在而存者創痍滿身陛下龍潛時親總師旅臣事麾下悉臣

之愚是時數以微功已爲李輔國讒間幾至毀家陛下卽位知臣負謫遂開獨見之明杜衆多之口拔臣於汧隴任臣以朔方游魂反幹朽骨再肉前日回紇入塞士人未曉京輔震驚陛下詔臣至太原勞問許臣一切處置因得與可汗計議分道用兵收復東都掃蕩燕薊時可汗在洛爲魚朝恩猜阻已失歡心及臣護送回紇雲京閉城不出潛使攘竊蕃夷怨怒彌縫百端乃得返國臣還汾州休息士馬雲京亦不使一介相聞畏臣劾奏故構爲飛謫以起異端陛下不垂明察欲使忠直之臣陷讒邪之黨臣所爲拊心泣血者也然臣之罪有六無所逃死往者同羅背逆以騷河曲兵連不解臣不顧老母從先帝於行在募兵討賊同羅奔殄是臣不忠於國罪一也斬子玠以令士衆捨天性之愛是臣不忠於國罪二也一女遠嫁爲國和親合從殄滅是臣不忠於國罪三也又與子瑒躬履行陣志寧邦家是臣不忠於國罪四也河北新附諸鎮皆握彊兵臣之撫綏反側時定是臣不忠於國罪五也協和回紇戡定中原二陵復土使陛下勤孝兩全是臣不忠於國罪六也又言來瑱之誅不暴其罪天下爲疑四方奏請陛下皆云與驃騎議之可否不出宰相詞言慢很帝一不爲懷且欲其悔過故推心待之詔宰相裴遵慶臨諭詔旨因察其去就遵慶至懷恩抱其足泣且訴遵慶道帝所以不疑卽勸入朝懷恩許諾副將范志誠諫以爲嫌隙成矣奈何入不測之朝獨不見來瑒李光弼乎二臣功高不賞瑒已及誅懷恩乃止欲使一子入宿衛志誠固止御史大夫王翊使回紇還懷恩慮洩其交通狀因留不遣卽使瑒攻雲京雲京敗進攻榆次初帝幸陝顏真卿請奉詔召懷恩至是帝使往辭曰臣往請行時也今無及矣帝問故對曰頃陛下避狄于陝臣見

恩責以春秋義不奔問官守故懷恩來朝以助討賊則其辭順今陛下卽宮京邑懷恩進不勤王退不釋衆其辭曲必不來矣然則奈何曰今言懷恩反者獨辛雲京李抱玉駱奉先魚朝恩四人耳自餘盛言其枉然懷恩將士皆郭子儀舊部曲陛下若以子儀代之喻以逆順必相率而歸從之子儀至河中場攻榆次未拔追兵于祁責其緩鞭之衆怒是夕偏將焦暉白玉等斬其首獻闕下懷恩聞以告母母曰我戒汝勿反國家訓汝不淺今衆變禍且及我奈何懷恩再拜出母提刀逐之曰吾爲國殺此賊取其心以謝軍中懷恩走乃與部曲三百北渡河走靈武稍稍引亡命軍復振帝念舊勲不加罪詔輦其母歸京師厚卹之以壽終又下詔拜懷恩太子兼中書令大寧郡王罷餘官懷恩固惡不能改遂誘吐蕃十萬人塞豐州守將戰死進掠涇邠祭來塋墓渡涇水邠寧節度使

白孝德禦之覆其陣懷恩泣曰曩皆爲我子反爲人致死於我人侵奉天子儀拒退之永泰元年帝集天下兵防秋懷恩誘合諸蕃號二十萬人寇吐蕃自北道逼醴泉擣奉天任敷鄭廷郝德自東道寇奉先以窺同州羌渾奴刺自西道略葭州趣鳳翔京師震駭詔子儀屯涇陽渾日進白元光电奉天李光進屯雲陽馬璘郝廷玉屯便橋董秦屯東渭橋駱奉先李自越屯盤屋李抱玉屯鳳翔周智光屯同州杜冕屯坊州帝御太軍屯苑中下詔親征懷恩至鳴沙病甚還死靈武部曲焚其尸以葬部將張韶徐璜玉不能定其軍皆前死范志誠統衆寇涇陽時諸屯堅壁大雨溪坎流潰賊不得進吐蕃旣持久又與回紇爭長更相疑莫適先進因焚廬舍驅男女數萬去周智光邀戰澄城破之收馬牛軍資萬計回紇乃詣子儀降請擊吐蕃自效子儀分兵隨之破其衆於涇州任敷走

羌渾詣李抱玉降始懷恩立功門內死王事者四十六人及拒命士不弛中凡三年帝隱忍數下詔未嘗聲其反及死爲之惻然曰懷恩不反爲左右所誤耳俄而從子名臣以千騎降大曆四年冊懷恩幼女爲崇徽公主嫁回紇云

周智光少賤失其先系以騎射從軍起行間爲裨將魚朝恩鎮陝州與相昵款數稱薦之累遷同華二州節度使永泰元年吐蕃回紇党項羌渾奴刺衆十餘萬寇奉天智光邀戰澄城破之獲駝馬軍資萬計逐北至鄜州素與杜冕仇嫌時冕屯坊州家在鄜智光入殺刺史張麟害冕宗屬八十人火民二千舍而去朝廷召懼不赴更詔冕使梁州避讎莫其來偃然不聽命聚不逞數萬恣剽掠以甘其欲結固之殺陝州監軍張志斌及前虢州刺史龐充初志斌自陝入奏智光慢不爲禮志斌責之怒曰僕固懷恩豈反者邪

皆鼠輩弄威福趣之禍也我本不反今爲爾反遂叱斬志斌響帳下時崔圓自淮南納方物百萬盜頡其半天下貢奉輸漕劫留之士訟調當西者懼何詰間道走同者遣部將邀捕斬之代宗未暴其罪命中使余元仙持詔拜尚書左僕射既授詔憲語曰吾有大功上不與平章事且同華地狹不足申脚若加陝虢商鄜坊五州差可因言諸子皆彎弓一百斤有萬人敵挾天子令諸侯非智光尚誰可卽歷詆大臣元仙震汗徐遺百練遣之自立生祠俾其下禮賽大曆二年帝詔郭子儀密圖之同華路閉詔書不能通乃召子儀壻趙縱受口詔書帛內密丸遣家童走間道傳詔子儀得詔聲言討之未行其衆大攜部將李漢惠自同州降子儀乃貶智光澧州刺史聽百人隨身貸將吏一切不問尋爲帳下斬其首并斬子元耀元幹來獻詔梟首皇城南街判官邵賁別將蔣羅漢並伏

誅敕有司具儀告太清宮太廟七陵先是淮西李忠臣入朝充
關聞智光反率兵討之會敗忠臣因入華大掠自赤水至潼關
產財物皆盡官吏至衣紙自蔽累日不食者

梁崇義京兆長安人以槩量業於市力能舒鉤後爲羽林射生事
來瑱沈默寡言瑱自襄陽朝京師分諸將戍福昌南陽瑱誅戍者
潰崇義自南陽勒衆還襄州與李昭薛南陽相讓爲長衆曰非梁
卿莫可遂總其軍殺昭及南陽脅制衆心代宗因卽拜節度使舉
七州兵二萬與田承嗣李正己薛嵩李寶臣相輔車根牙繫結然
獨以地褊兵少法令最治折節遇士以自振襄漢間人識教義親
厚數諷入朝答曰來公有大功良闕賢讒逡巡辭召至代宗立不
待駕而朝卽見族吾輩盈矣若何欲見上平建中元年李希烈請
討之崇義懼整飭軍旅男子郭青上變事德宗欲示以信流昔遠

方詔全部員外郎李舟諭旨初劉文喜之難舟奉詔入涇州俄而
帳下斬文喜以聞四方傳舟能覆軍殺將反側者皆惡之舟至以
入朝勸崇義崇義不悅明年遣使尉撫諸道舟復如崇義所遂不
肯內請易它使更命給事中盧翰往崇義益不安跋扈甚諫者多
死朝廷以不疑示天下乃加同中書門下平章事妻及子悉封賞
賜鐵券擢其將蒲杲爲鄧州刺史遣御史張著以手詔召崇義崇
義使卒持滿乃受命杲奉詔不敢發詣崇義自言崇義對著號哭
遂拒詔帝命李希烈率諸道兵進討崇義先攻江陵欲通黔嶺敗
於四望而還殺希烈臨漢屯兵千餘希烈怒引兵循漢而上崇義
使翟崇暉杜少誠戰蠻水折北至涑口大敗二將降希烈寵之使
部降兵徇襄陽約百姓按堵崇義閉壁守者斬關出不可止乃與
妾赴井死傳首京師希烈誅其親族及軍從臨漢役者三千人崇

義孫叔明養於李納後從劉悟爲昭義將從諫死遣進旄節有詔誅之

李懷光渤海靺鞨人本姓茹父常徙幽州爲朔方部將以戰多賜姓更名嘉慶懷光在軍積勞至開府儀同三司爲都虞候勇鷙敢誅殺雖親屬犯法無所回貸節度使郭子儀仁厚不親事以紀綱委懷光軍中畏之會母喪起兼邠寧慶都將德宗罷子儀副元帥以所部兵分諸將故懷光檢校刑部尚書爲寧慶晉絳慈隰等州節度使引衆城長武據原首臨涇水以扼吐蕃空道自是不敢南侵建中初楊炎欲城原州使懷光兼帥涇原遂其功原州宿將史抗溫儒雅等故子儀麾下嘗在懷光右及處其下意鬱鬱懷光因罪誅之由是涇軍迎畏劉文喜者因衆懼遂叛詔與朱泚討平之加檢校太子少師明年徙朔方節度使實封戶四百仍領邠寧時

馬燧李抱真討田悅未克詔懷光以朔方兵萬五千并力懷光至魏未及營與朱滔等戰連篋山爲賊所敗悅因決水灌軍燧等退屯魏縣尋進同中書門下平章事益戶二百與滔等相持久不戰帝狩奉天懷光率所部奔命方雨淖奮厲軍士倍道進自蒲津絕河敗泚軍於醴泉將抵奉天前遣裨將張韶以蠟韜表隨賊攻城叩壘呼曰我朔方使也縋而上比登身被數十矢時帝被圍急聞之喜卽持韶大號城上人心乃安又敗賊於魯店泚解圍去進加副元帥中書令懷光爲人疏而懷誦言宰相謀議乖刺度支賦斂重京兆尹刻薄軍食天下之亂皆由此吾見上且請誅之或以告王翊翊等計懷光有大功上且訪以得失使其言入豈不殆哉遂告盧杞杞卽說帝曰懷光兵威已振逆賊破膽若席勝可一舉滅賊今入朝則必宴勞留連賊得從容完備卒難圖也帝不得其情

因然之乃敕懷光屯便橋督諸將進討懷光自以徑千里赴難爲
姦臣根隔不得朝頗恚悵去屯咸陽明日李晟會陳濤斜壁壘未
具賊大至晟說懷光曰賊係宮苑攻之良難今敢離窟穴與公薄
戰此天以賊賜公也懷光曰吾馬未秣士未飯可遽戰哉姑養吾
勇以待之晟不得已閉壁不出懷光數暴杞等罪帝爲貶杞與趙
贊白志貞又劾奏中人翟文秀亦殺之以尉懷光然並自疑堅壁
八旬不出戰屢詔使進軍以伺釁爲解陰連朱泚初崔漢衡使吐
蕃求助兵尚結贊曰吾法進軍以本兵大臣爲信今制書不署懷
光未敢前帝乃命翰林學士陸贄詣懷光議事懷光陳三不可且
言吐蕃舍人馬重英陷長安贊普責其不焚焚今其來必肆宿志
一不可彼云引兵五萬旣用其人則同漢士儻邀我厚賞何以致
之二不可虜人雖來義不先用勒兵自固以觀成敗王師勝則分
功敗則圖變狡詐多端不可信三不可卒不肯署又嫚罵贄曰爾
何能興元元年詔加太尉賜鐵券懷光赫然怒曰凡疑人臣反則
賜券今授懷光是使反也抵于地時部將韓游瓌將兵衛奉天懷
光約令爲變游瓌以聞數日又密書趣之門者捕送又遣將趙升
鸞謀於奉天升鸞告渾瑊曰懷光遣達奚承俊火乾陵使我爲內
應以脅乘輿瑊白發其姦請帝決幸梁州帝令瑊戒嚴未畢帝自
西門出詔戴休顏守奉天懷光遣將孟廷寶惠靜壽孫福率輕騎
趨南山糧料使張增遇之三人計曰吾屬以叛聞不如緩軍彼怒
不過不吾將耳使增給衆曰由此東吾有見糧可食也廷寶等引
而東縱卒大掠而百官遂入駱谷追帝不及還白懷光懷光怒悉
罷其兵懷光乃奪李建徽陽惠元等軍屯好畤然其下稍稍攜貳
泚始憚之至是欲遂臣懷光懷光怒告絕益不安乃引兵掠涇陽

三原富平遂如河中留張昕守咸陽而孟涉段威勇擁兵降李晟韓游瓌殺昕以邠州歸戴休顏自奉天令於軍曰懷光反乃城守有詔以懷光爲太子太保許其麾下擇功高者一人統其兵不奉詔懷光至河中取同絳二州按兵觀望京師平命給事中孔巢父中人啖守盈召之皆爲懷光帳下所害於是繕兵嚴守帝乃遣渾瑊討之度支欲罷其軍歲中稟賜帝曰朔方軍累有功豈以懷光拒命而衆不被恩邪詔所司別貯繡錢須事定乃給瑊破同州屯軍不得進數爲懷光所衄帝以河東節度使馬燧威名白著乃拜副元帥與瑊及鎮國駱元光邠寧韓游瓌鄜坊唐朝臣會兵進討燧拔絳州諸軍遂圍河中貞元元年八月朔方部將牛勣斬懷光傳首以獻年五十七帝念其功詔許一子嗣賜莊第各一區聽以禮葬妻王徙澧州初懷光死其子璠盡殺其弟乃死故懷光無後五年詔曰懷舊念功仁之大也興滅繼絕義之至也昔蔡叔圯族周封其子韓信干紀漢爵其孥侯君集不率太宗存其祀考先王之道烈祖之訓皆以刑佐德俾人嚮方曩者盜臣竊發朕侍近郊懷光夙駕千里奔命行在假雷霆之威破虎狼之衆守節靡終潛構禍胎大戮所加自貽伊戚孤魂無歸懷之愆然宜以外孫燕賜姓李名曰承緒以左衛率府胄曹參軍繼懷光後仍賜錢百萬置田墓側以備祭享還妻王使就養云

陳少游博州博平人幼習老子莊周書爲崇玄生諸儒推爲都講有媚者欲對廣衆切問以屈少游及升坐音吐清辯據引淹該問窮而對有餘大學士陳希烈高其能旣擢第補南平令治有聲累遷侍御史回紇糧料使加檢校職方員外郎充使檢校郎官自少游始僕固懷恩表署河北副元帥判官遷晉鄭二州刺史少游長

權變所至一切幹濟賄謝權幸以是數遷李抱玉去澤潞副使爲
陳鄭留後永泰中復奏爲隴右行軍司馬擢桂管觀察使少游不
樂遠去規徙近鎮時宦官董秀有寵掌樞近少游乃宿其里候歸
沐入謁因鄙語諂謂秀曰七郎親屬幾何月費幾何秀謝曰族甚
大歲用常過百萬少游曰審如是奉人不足爲數日費當數外營
乃辦耳吾雖不才請獨取濟歲輸錢五十萬今具其半請先入之
秀大喜與厚相結少游因泣曰嶺南瘴癘恐不得生還見顏色秀
遽曰公美才不當遠出請少待時少游已納賂元載子仲武於是
內外更薦之改宣歙池觀察使大曆五年徙浙東封潁川縣子遷
淮南節度使喜譎數行小惠羣吏任職三總藩皆天下富饒處以
是斂求貿易無虛日積財寶巨億萬初結元載賂金帛歲無慮十
萬緡又事宦官駱奉先劉清潭吳承倩及秀故能久其任後載以

過見疑少游亦疏之載子伯和謫揚州少游陽晉之陰奏其罪代
宗以爲忠建中初朝廷經費不充始請本道稅錢千增二百鹽斗
加百錢度支因請諸道並增焉李納拒命少游出師收徐海等州
俄棄之退屯盱眙累進檢校尚書左僕射賜封戶三百加同中書
門下平章事時宰相關播盧杞與少游有雅故故驟兼台司德宗
幸奉天度支汴東兩稅使包佶寓揚州所儲財賦八百萬緡將輸
京師少游意朱泚勢盛不遽平欲脅取其財使判官崔頴就佶索
文簿貸二百萬緡佶以非勅命拒之頴怒曰君善得爲劉長卿不
爾爲崔衆矣長卿嘗任租庸使爲吳仲儒所囚崔衆以倨李光弼
被殺故頴以爲言佶謁少游欲諫止不得語卽遣去於是財用悉
爲少游所掠佶奔白沙少游遣幕中房孺復召之佶驚走度江伏
妻子案牘中以免佶有禦邊兵三千令高越元甫將焉少游奪之

能隨信者至上元復爲韓滉所留信但諸史如江鄂州以表內蠟丸以聞會少游使至帝詰其事辭以不知時禍難煽結帝未能制乃曰少游國守臣取信之財防它盜耳庸何傷遠近聞之咸稱帝得其機云少游聞之果自安不疑李希烈陷汴聲言襲江淮少游懼遣參謀溫述送款曰豪壽舒廬旣韜刃卷鎧惟君命又使巡官趙詵如鄆州厚結李納希烈僭號遣將楊豐齎僞赦令送少游壽州刺史張建封邏得之斬豐以僞赦送行在會信入朝具言少游脅財賦狀少游慙上表言所取以贍軍興請償之而州府殘破不能償乃與腹心吏設法重稅民皆苦之劉洽取汴州得希烈僞起居注書某月日陳少游上表歸順少游聞羞悸發病死年六十一贈太尉

贊曰懷恩與城百戰闖宗死事至四十六人遂汎掃燕趙無餘埃

功高威重不能防患凶德根于心弗得其所輒發果於犯上惜哉其母拔刀逐賊烈婦人也懷光提萬衆振天子於難一爲讒人所沮忿戾不自還身首殊分然讒人亦可疾矣所謂交亂四國者也李錡淄川王孝同五世孫以父國貞陰謂鳳翔府參軍貞元初遷至宗正少卿嘗與卿李幹爭議錡以直不坐德宗兩置之自雅王傳出爲杭湖二州刺史方李齊運用事錡以賂結其歡居三歲遷潤州刺史浙西觀察諸道鹽鐵轉運使多積奇寶歲時奉獻德宗昵之錡因恃恩驚橫天下摧酒漕運錡得專之故朝廷用事臣錡以利交餘皆乾沒于私國計日耗浙西布衣崔善貞上書闕下暴其罪帝械以賜錡錡豫浚大坎至則并械壅坎中聞者切齒錡得志無所憚圖久安計乃益募兵選善射者爲一屯號挽硬隨身以胡奚雜類蚪須者爲一將號蕃落健兒皆錡腹心稟給十倍使號

錡爲假父故樂爲其用帝於是復鎮海軍以錡爲節度使罷領鹽鐵轉運錡喜得節而忘其權去暴踞日甚屬吏死不以過甚衆又逼汚良家寮佐力諫不能得遽遁去憲宗卽位不假借方鎮故僞彊者稍稍入朝錡不自安亦三請覲有詔拜尚書左僕射以御史大夫李元素代之中使馳驛勞問兼撫慰其軍錡署判官王澹爲留後錡無入朝意稱疾遷延不卽行澹及中使數趣之錡不悅乘澹視事有所變更者諷親兵圍澹因給冬服錡坐幄中以挽硬蕃落自衛澹與中使人謁旣出衆持刀嫚罵殺澹食之監軍使遣牙將趙琦慰諭又食之以兵注中使頸錡陽驚扈解乃囚別館蕃落兵薛頡主之挽硬兵李鈞主之又以公孫玠韓運分總餘軍室五劔授管內鎮將令殺五州刺史屬別將庾伯良兵三千築石頭城謀據江左帶州刺史顏防用其客李雲謀矯詔稱招討副使殺鎮

將李深傳檄蘇杭湖睦四州同討錡湖州辛秘亦殺鎮將趙惟忠而蘇州李素爲鎮將姚志安所執釘舷上獻於錡錡敗而免憲宗以淮南節度使王鐔爲諸道行營兵馬招討處置使中官薛尚衍爲都監招討宣慰使發宣武武寧武昌淮南宣歙江西浙東兵自宣杭信三州進討初錡以宣州富饒遣四院隨身兵馬使張子良李奉仙田少卿領兵三千分下宣歙池錡甥裴行立雖預謀而欲效順故相與約還兵執錡行立應於內子良等旣行其父諭軍中曰僕射反矣精兵四面皆至常湖鎮將干首通衢勢蹙且敗吾輩徒死不如轉禍希福部衆大悅遂迴趣城行立舉火內外合謀行立攻牙門錡大驚左右曰城外兵馬至錡曰何人邪曰張中丞也錡怒甚曰門外兵何人也曰裴侍御也錡拊膺曰行立亦叛吾邪跣足逃于女樓下李鈞引兵三百趨山庭院格鬪行立兵貫出其

中斬鈞傳首城下鈞聞之舉族慟哭子良以監軍命曉諭城中逆
順且呼鈞束身還朝左右以幕縋而出之鈞以僕射召數日而反
狀至下詔削官爵明日而敗送京師神策兵自長樂驛護至闕下
帝御興安門問罪對曰張子良教臣反非臣意也帝曰爾以宗臣
爲節度使不能斬子良然後入朝邪鈞不能對以其日與子師回
腰斬于城西南年六十七尸數日帝出黃衣二襲葬以庶人禮擢
子良檢校工部尚書左金吾將軍封南陽郡王賜名奉國田少卿
檢校左散騎常侍左羽林將軍代國公李奉仙檢校右常侍右羽
林將軍邠國公裴行立泌州刺史贈王澹給事中趙琦和州刺史
崔善貞睦州司馬前鈞屬籍從弟宋州刺史銛通事舍人銑從子
師偃流嶺南

贊曰語曰出入之吝謂之有司賤之也德宗平朱泚京師府藏耗

竭諸道始有進奉助經費而詔書亦往往宣索於天下以人主規
規財利下行有司之事天下無事賦取猶不息劔南江西有日月
之進杜亞劉贊王緯及鐔歲時進奉以固其寵號稱賦外羨餘又
亦託中旨以盜庫物然獻纒十二三餘皆私之江淮以南物力大
屈人人惓然忘生貞元以後中官市物都下謂之宮市不持符牒
口含詔命取濫縑惡布紅紫之倍其估裂以償直市之良賈精貨
皆逃去不出列屬閭者惟羸雜苦窳而已又有彊驅人禁中罄所
車輦賣者不平因其歐笞之蒼頭女奴名馬工車惴惴常與捕取
而德宗蔽於左右前後莫知也故善貞因鈞并論其事卒不知鈞
顯鹽鐵之利以養兵圖叛曾不及庸有司之吝遠甚

叛臣列傳

百四十九上終

魏書

唐書一百二十四上



